

隆平紀事卷上

松陵史 冊義維纂輯

震澤曹 森卓亭
從孫史開基體仁 叅訂

元至正十三年癸巳春正月張士誠起自秦州士誠
秦州白駒場亭人字確卿小字九四少有膂力負氣
任俠輕財好施得群輩心與弟士義士德士信並駕
運鹽綱兼舩私販諸富家或負其直不雥多加凌侮
弓手邱義尤窘辱之士誠忿甚時海內大亂豪傑蜂
起所在割據士誠乃帥諸弟結壯士李伯昇潘原明
呂珍等共十八人殺義并滅諸富家縱火焚之跳入

勞場招諸少年起兵鹽丁方久苦重役遂共應士誠
推為主先是州人王克柔家富多結游俠謀不軌高
郵知府李齊收捕于獄有李華甫者素感克柔恩謀
聚衆劫獄不果李齊招安華甫以為泰州判至是士
誠陽與華甫合因集諸壯士共殺華甫并其衆起兵
至丁溪為大姓劉子仁者所扼多被殺傷士誠憤攻
之急子仁衆潰入海遂并有其資兵勢日盛從者萬
餘人

按史書士誠起兵在五月蓋自其據高郵為始然
考續宏簡錄稱不數月攻陷泰州俄陷興化入寶

應據高郵則知其據高郵之前起兵多日寔不始
于五月也

三月攻陷秦州元參知政事趙璉死之士誠初陷秦
州元遣知府李齊招撫之士誠偽降請授民職且乞
從征自効元立義兵元帥府以官其黨且立淮南行
中書省于揚州以扼其勢以璉為參知政事移鎮秦
州璉趣士誠治戈船趨濠泗士誠疑憚不肯發覘知
璉無備遂復叛夜四鼓糾黨縱火登城璉捫佩刀上
馬格鬪士誠圍之璉罵曰汝罪在不赦既宥且爵朝
廷何負于汝乃敢復反即前奮擊士誠以槊撞璉墜

陸年錄卷五
地連瞑目大罵而死其僕楊兒以身蔽理亦死士誠
遂劫官庫乘勝陷興化

按元明之際紀載多錯互陶南村輟耕錄稱趙璉
死事在後年士誠攻揚州時南却生當其時所述
自當核然考璉以行省叅政自揚州移鎮泰州泰
州陷遂死之實非死于揚州也今據續通鑑綱目
續宏簡錄及明史諸書訂正

夏五月襲據高郵時士誠攻陷興化結砦德勝湖元
行省以左丞契哲篤鎮高郵出李齊守壁社湖突有
數騎呼譟入城省憲官皆遁齊急還城門已閉矣士

誠遂據高郵下令出獄囚蠲民逋凡知名之士取用
之

元遣使至高郵招諭淮南行省照磨盛昭高郵知府
李齊並不屈死元知士誠不可制降詔赦其罪遣使
招安使至不得入城邊還詭稱士誠已迎拜但乞名
爵行省不虞使欺再遣盛昭往授以水軍萬戶告身
授士誠士誠拒不受拘昭舟中既而官軍逼高郵士
誠授昭以兵使出拒昭叱曰汝拘留詔使罪不容誅
又欲我從汝反耶士誠怒磔之行省仍遣使諭士誠
使至又不得入士誠始曰必李知府來乃受詔初李

齊招撫士誠于秦州被留亡何士誠黨自相戕始縱
歸至是復要之往行省乃強齊往至則囚之齊乃聲
言士誠本無降意特遷延為繕飭計耳官軍謀知之
進攻城士誠呼齊出叱令跪齊反叱曰我膝如鐵豈
為賊屈立而詬乃碎其膝剛之

元淮東宣慰司掾納速刺丁會兵擊士誠不克死之
士誠屯兵高郵東門納速刺丁以舟師會真滁諸軍
討之距三堞鎮士誠軍鼓譟迎擊官軍發火鏃射之
死者蔽流而下士誠兵緣船于背盡斃來攻諸官軍
皆遁納速刺丁與其三子寶童海魯丁西山驢皆力

戰死

六月元命淮南行省平章政事福壽擊士誠不克
冬十月士誠分兵徇旁縣皆下之

至正十四年甲午士誠自稱誠王僭號大周建元天
祐大赦境內設官分截要衝南北道梗

按諸史書士誠僭號改元在十三年癸巳盡據其
起兵陷高郵連書之耳考輟耕錄紀士誠至平江
改至正十六年為天祐三年則是齊于十四年始
稱天祐元年又史稱士誠自稱王至亡凡十四年
計吳亡于二十七年丁未則是稱王正在十四年

甲午也

春三月周令所屬務農桑令曰元氏之亂多在民窮夫獨其君之不仁哉良以有司不宣德意妄立科條志在肥家不恤民隱以致百姓求生無路引義不能遂至崩解起兵之意誠欲出生民于塗炭予所在以安全食為民之天農桑為民事之本有土有財只在利導既富且教尤要提撕令下之日務曲體予衷相機度宜俾處處有生養之具毋徒以文具相塗飾也因命慎擇長吏嗣後以民生登耗為殿最

夏四月令州縣興學校令曰風化之本係人倫賢才

之興闕學校今者豪傑並起相與背叛良由父子夫婦兄弟之道失序故君臣之義不明庶耻道喪王綱解紐實在于斯凡屬州縣聿稽前典務選明博好禮之士朝夕諷誦以修明倫序以興起賢能因命春秋鄉飲博舉明經

夏六月士誠攻揚州元平章達識帖睦爾總領漢軍蒙古兵禦之敗績諸軍皆潰士誠遂破揚州會士義被獲見殺士誠退還高郵尋進陷盱眙及泗州

按稱士義于初起兵時為丁溪大姓劉子仁所扼中矢死据輟耕錄則士義于揚州之役被獲考揚

廉夫毘陵行詩有云當時上將陷江都至今莫贖
千金軀蓋指士義被獲事則士義寔死于揚州也
秋九月士誠復攻揚州元湖廣行省右丞阿魯恢引
苗軍來士誠退

元命右丞相脫脫督諸軍擊張士誠總制諸王各首
軍馬諸酋各翼軍馬號百萬旌旗累千里不絕
冬十一月丁卯脫脫統大軍至高郵與士誠連戰大
破之遂圍高郵先是樞密院都事石普從守淮南詣
脫脫面陳破敵之策曰高郵負重湖之險地沮洳騎
兵莫能前願假步兵三萬保取之脫脫壯其言與兵

萬人為先驅行次范水啓日未夕普令軍中具食入
夜卸杖趨寶應即登城樹幟守者出不意大驚潰普
乘勝連拔十餘砦直抵高郵縱火燒閉門而搃兵者
遣蒙古軍千騎突出普軍前欲收先入功敵兵以死
扞蒙古軍即懼怯馳回普止之不可軍亂遂為敵兵
所蹂踐率墮水中普獨直入敵陣中搏戰被創墮馬
復奮起步戰數合力盡與從者三十人俱死既而脫
脫大軍繼至連戰旬有五日士誠連敗不能支元兵
遂圍高郵士誠欲突圍出走卜之謂當固守敵且退
遂堅持不動是時脫脫部將董搏霄分下盩城興化

盡拔大縱得勝兩湖間十二水砦又分兵西平六合
士誠勢大盛

按續宏簡錄稱士誠敗不能支與呂珍潘原明等
突圍出走與此異至紀事本末及從信錄直稱脫
脫遂克高郵者誤

十二月元削脫脫官爵安置淮安以秦不花等代領
其軍元兵潰去時脫脫攻高郵急隳其外城城且下
士誠窮蹙謂亡在旦夕忽聞殷雷聲賀曰可以戰矣
登樓仰視曰龍文虎氣集我營上急擊勿失俄有詔
解脫脫兵柄削官爵安置淮安元諸將皆憤恨鐵甲

軍多散去城中乘間閉門奮擊元兵大潰走士誠軍
勢復振

按原本稱脫脫被讒劫兵不戰至十五年十月始
削官爵者誤考順帝信哈麻之譖謂脫脫出兵三
月畧無寸功遂下詔削官爵則脫脫出師高郵甫
三月耳今據諸史改正

至正十五年乙未春二月劉福通以韓林兒稱宋帝
改元龍鳳號明王

夏六月明太祖朱元璋起兵始渡江取太平路軍中
用龍鳳淮東饑

冬壬誠遣兵渡江窺平江路時江陰群盜並起有朱英者已就撫復叛乃奔高郵質妻子乞兵自救士誠初疑之英乃盛陳江南土地之廣錢糧之富子女玉帛之盛以艷其心士誠亦以淮東飢乏謀他掠乃遣弟士德率衆由通州渡江而南攻常熟

元道翰林待制烏馬兒集賢待制孫撫至高郵招諭時朝廷猶冀士誠有降意乃遣二人賞宣明印牌至既入城反覆開諭士誠佯竦聽已而拘之別室一日饋食欲脇之降撫大詬斥乃令其下捶撫撫不為動至正十六年丙申春正月朔張士誠陷常熟遂進攻

平江

二月壬子朔入平江據之平江承平久城中無備士德兵猝至參政脫寅一作統官軍民義捍禦境上達魯花赤哈散沙領兵出戰總管貢師泰巡守城池士德攻城急分守麥門楊椿督民伍挺身力戰死之城遂陷廉訪司饒介分守齊門兵亦驚潰哈散沙聞城破自溺死脫寅匿叢篠中為游兵所殺貢師泰棄城懷印道士德兵僅三千人長驅而入遂據平江既而崑山吳江嘉定崇明諸州縣相繼降附改平江路為隆平即築月城時江南全盛甲伏錢穀如山簡括倉

庫足資十年

三月癸巳周王張士誠自高郵徙都隆平服御器用皆擬乘輿以承天寺為王府遷佛像踞坐大殿中且親射三天于棟以識之以定都隆平告四方改至正十六年為天祐三年歷曰明時立省院六部百司以陰陽術人李行素為丞相弟士德為平章提調各郡兵馬蔣輝為右丞居內省理庶務潘原明為左丞史文炳知樞密院徐義徐志堅典親軍李伯昇節制軍事幕官韓謙錢輔及蘇昌齡蔡彥文為參謀署饒介為淮南行省參政周仁為隆平太守凡郡州縣正官

郡稱太守州稱通守縣仍曰尹郡同知稱府丞知事曰從事擇寺觀豪門為省院部司及諸將士所居分奪互易者幾月乃定

命籍戶口田賦皆仍元舊悉免風浦更賜今年田租十之四並賜高年粟帛及貧民粥糜

設學士員開宏文館將吏子弟民間俊秀游其中者皆給廩餼歲比其業更設禮賢館括四方明博之士居之

命築常熟吳江城又遣將呂珍築嘉定城並易土以
碑石

令設郡勸農使縣勸農尉講修水利
是月明太祖下集慶路

夏四月遣兵徇松江下之初元元帥王與敬由平江
戰敗趨嘉興與苗軍帥楊完者不協乃投松江復與
鎮守不協乘釁焚掠楊完者乃遣將率苗軍攻與敬
與敬遁投士誠降苗軍復肆焚掠括金銀財帛巨萬
計聚于東門士誠遣史文炳部兵馬自泖湖古浦塘
進苗軍一天不交竟潰散松江遂下以史文炳鎮之
分兵下湖州改為吳興郡以左丞潘原明鎮之又遣
兵下常州有黃貴甫者間道歸士誠請為內應兵至

不戰而破遂改常州為毘陵郡

元集賢待制孫撫謀復高郵死之初撫奉使高郵被
拘不屈至是士誠據平江轉掠湖松諸州撫與士誠
部將張茂先謀持撫所授站馬劄子遣壯士赴鎮南
王府約日進兵復高郵謀泄遂遇害後士誠軍中見
失節者輒自相嘆曰此豈孫待制耶

六月遣將史文炳攻嘉興大敗還元苗軍帥楊完者
為江浙行省參政領苗獠獠名曰谷刺罕七嘉興
守禦甚堅先是屢攻不克至是文炳大舉兵臨其東
門盡為所殲文炳僅以身免

秋七月張士德率兵陷杭州既而潰走士德與王與
敬合兵間道攻杭州軍氣甚銳元平章政事左荅納
失里力戰死江浙左丞相達識帖睦迺遁入富陽士
德入城檢括擄掠會有萬戶普賢奴者年尚幼率兵
出戰參政楊完者領苗兵繼進夾擊州民亦執挺巷
戰士德大潰走初江南亂達識帖睦迺等屢敗議者
謂苗軍可用遂自齊慶招土官楊完者至淮南殺賊
以功累官參政至是杭州破完者奉檄自嘉興引苗
兵赴援擊走士德復杭州達識帖睦迺還士德收
殘兵攻海鹽為乍浦鍾氏所撓不克

遣使徵元江浙行省員外郎楊乘不屈死之
築土城于平望時楊完者引苗軍屯嘉興之合路故
築城捍之

明叛將陳保二來降初常州人陳保二聚衆以黃怕
裏首號黃包軍明師下鎮江徇奔牛呂城保二降至
是復舉衆叛降士誠誘執明舊李二將以去

是月明太祖初稱吳國公己亥吳國公遣儒士楊憲
奉書至隆平通好書畧曰近聞足下兵由通州遂有
吳郡昔隗囂據天水以稱雄今足下據姑蘓以自王
事勢相等吾深為足下喜吾與足下東西境也睦隣

保境古人所貴吾甚慕也自今通使往來毋惑于交構之言以生邊釁士誠得書以比之隗囂甚志留憲不報

周遣舟師攻鎮江明統軍元帥徐達禦之于龍潭焚其舟殺溺甚衆又攻宜興明管軍總管耿君用率兵援宜興爭柵力戰中禦死之宜興遂陷

明遣徐達湯和率師攻常州吳國公諭達等曰張士誠起鹽徒譎詐多端宜速出軍攻毘陵先機進取以沮其謀于是達督兵進薄常州會降將鄧清叔糧奔周軍又長興新附卒七千人從其帥叛入周反攻達

營達乃退營牛塘谷周軍圍之數重達軍食且盡會常遇春引兵自池州來援擊周軍大敗之禽梟將張將軍達遂復進攻圍之未下

八月明益兵圍常州徐達軍城西北湯和軍城北張彪軍城東南士誠遣弟士德以數萬衆來援達曰張九六士德狡而善鬪當以計取之乃去城十八里設三覆以待別遣總管王均用以鉄騎為奇兵達與士德交鋒均用鉄騎橫衝其陣陣亂士德退走遇伏遂大敗擒其將張虎湯雄殺鹵以萬計士德遁

按常州之戰或稱士德遇伏陣亂退走馬蹶為先

鋒刁國寶王子虎所獲并擒其將張湯二人考輟
耕錄通鑑綱目弇州史料紀事本末諸書並同此
蓋傳聞之誤明史紀常州之戰止稱獲張湯二將
至士德被擒乃係十七年七月明兵下常熟時事
為前鋒趙德勝所擒張士誠本傳及徐達趙德勝
諸傳皆合考士德至金陵後即貽書勸士誠降元
遂不食而死士德以十七年七月被擒士誠即于
是年八月降元其時正相合又明太祖復士誠書
但稱常州之師生擒二將初不及士德則知士德
實非于戡常州時被擒也今據明史改正又有陳

基舟中看虞山有感詩可證詩見下卷

冬十月遣兵陷淮安元淮東廉訪使褚不華死之先
是不華與判官劉甲共守淮守相犄角既而總兵者
怨不華乃檄甲別將兵擊賊與以困不華至是士誠
將史椿攻淮安掘濠相銜捷水寨圍之復據赤鯉湖
以斷沔陽一路餉道城中食且盡元帥吳德運米萬
斛入河復為椿所抄遣使十餘輩告急總兵者按甲
不出攻益急城中羅雀掘鼠及靴皮鞍韉革箱敗弓
之筋皆食盡而後人相食力窮城陷不華猶據西門
力關中傷見執為寇所嚮子伴哥亦死士誠遂使史

椿為淮安太守鎮之初元同僉淮南行樞密院事董
搏霄建守禦淮安之策謂速宜布連珠營使屯種而
食練兵積穀且耕且戰時不能用及是竟陷

明將華雲龍王弼敗士誠第士信兵于舊館擒驍將
湯元帥

周遣使至金陵請和時常州圍久不解士誠乃遣人
奉書請和曰向者竊伏淮東緣元政日弛民心思亂
乘時起義自泰州取高郵東連海壩遂有平江諸郡
若無位號何以令衆南面稱孤勢使然也伏惟上賢
以神武之資起兵濠右跨有江左遙為左右賀建大

業向獲唐李二將禮遇未遣繼蒙遣使通好愚昧不
明久稽行李今又蒙遣兵逼我毘陵咎寔自啟然省
已知過欲講和以解困阨願歲輸糧二十萬石黃金
五百兩白金三百兩為犒軍之資各守封疆各歸擒
獲永為盟信吳國公遣孫君壽復書云睦隣通好有
邦之常開釁言兵寔由于爾向者用師京口靖安疆
場師至奔牛呂城陳保二望風降附爾乃誘其叛逆
紿執我唐李二將繼遣楊憲通好又復拘留搆兵開
釁誰執其咎我是以有常州之師生擒張湯二將尚
以禮待未忍加誅足下誠知悔過不墮前好歸我使

臣將校仍餉軍需五十萬石即當班師大丈夫舉事當赤心相示浮言誇詞我甚厭之士誠得書不報明復益兵圍常州時和議既不成常州守將復誘明新附義兵叛去助之來攻徐達復請益兵乃以精兵二萬助之達營城南常遇春營東南三十里外周兵攻達壘急達勒兵出戰遇春與胡大海廖永安來援內外夾擊大破之擒其將張德餘兵奔入城

十二月周將呂珍潛入常州督兵拒守達復進逼之至正十七年丁酉春正月築崑山太倉城以禦方國珍初國珍首亂起台州劫掠海上焚蘇之太倉既而

降元元欲藉其力以攻士誠乃數以海軍犯崑山七戰七捷崑山州治自宋時遷太倉至是乃復遷舊治所馬鞍山下築王城以禦寇而于太倉去木城改築磚石以甯海濱積貯之所既而士誠遣人說方國珍結為婚姻崑山太倉之地遂得寧息

二月丙午明遣耿炳文等攻長興守將趙打虎以兵三千逆戰大敗走湖州戊申長興陷炳文追獲戰艦三百餘艘及其將李福安答失蠻等義兵萬戶蔣毅率所部二百人降炳文遂以總兵都元帥守長興三月戊午明徐達克常州初常州兵雖少食足堅拒

不下及被圍久敵衆糧少不能支呂珍宵遁達督諸將急攻之遂克常州湯和以同僉總管守之周殺淮安太守史椿椿見士誠屢敗而諸將驕侈左丞徐義更加譖毀乃謀遣人賫書詣金陵歸附事覺被殺

五月明院判俞通海等以舟師略太湖入馬跡山衝水寨周將王貴鈕律降通海賊舟胥口呂珍以兵猝至明兵欲退通海不可曰彼衆我寡退則情見遂決戰天下如雨通海中右目不為動徐令帳下士披已甲立船上曰我俞將軍也珍不敢逼引還通海亦退

乙亥周遣左丞潘元明元帥嚴再興侵長興明守將耿炳文擊敗之元明等遁

明副使張鑑等攻泰興士誠遣兵赴援敗走周將楊文德等被擒己卯泰興陷

六月戊午明院判趙繼祖元帥郭天祿鎮撫吳良等圍江陰士誠兵據秦望山以扼之繼祖引兵來攻會大風雨周兵奔潰遂奪據其山己未進攻城西門克之以吳良為指揮使守江陰復命其弟栢增兵協鎮士誠據全吳跨有淮東浙西長興江陰二邑寔其南北水陸門戶自長興失則步騎不敢出廣德窺宣歙

江陰失則舟師不敢泝大江上金陵由是侵軼路絕築城于虎邱又命潘元明築吳興城即舊城而小之務在堅厚而固諭之曰羣雄角力侵軼殊多吳興城大而枕湖灌水易圯衛爾室家不得不役爾民然征調屢煩余實屢念其來役者免今年田租

秋七月明徐達徇宜興未下別遣前鋒趙德勝攻常熟下之擒張士德士德泉鷲善戰能得士心浙西地皆其所畧定既被擒士誠氣大沮士德至金陵吳國公欲留之以招士誠士德不從乃間道貽士誠書俾降元自助士誠遂決降元之計

八月明徐達常遇春康茂木襲江陰馬馱沙克之獲其樓船

明將費子賢下武康

周王士誠降于元元以為太尉初士誠兵累敗勢日蹙復思降元及士德貽書勸降其計遂決乃為書遣使詣省相請降詞多不遜達識帖睦迺以其反覆不許使者往返議不定乃遣周仁往請楊完者亦固勸乃承制令參政周伯琦至平江撫諭之士誠始要王爵不許請為三公亦不許完者又力勸乃許之表授士誠太尉開府平江其弟士德淮南平章士信同知

樞密院事立江淮分省江浙分樞密院于平江以處其官屬將吏皆授官有差元以達識帖睦爾有招安功亦加太尉士誠雖去偽號奉元正朔而土地甲兵錢糧自據如故以蘇州于城為太尉府太尉士誠署參政周伯琦為同知太常禮儀院事尋拜江浙行省右丞

至正十八年戊戌春二月明俞通海廖永安桑世傑等攻江陰石牌戍時世傑陷陣死永安等奮擊擒守將蔡瑞朱錠盡獲其海舟遂拔之

三月士誠襲建德路敗還時明師初克建德以都指

揮李文忠守之士誠遣將與元苗帥楊完者率苗獠數萬水陸奄至城下文忠出奇兵破其陸軍取俘誠浮巨筏上乘流而下水軍見之亦遁

夏六月士誠攻常州守將湯和擊却之擒獲三百人常與吳接境自陷沒後士誠間諜百出而和防禦嚴密敵莫能窺至是力戰却之俘斬甚多

甲午士誠兵攻常熟明將廖永安與戰于福山港大破之

秋七月庚子廖永安追士誠兵于通州狼山再破之獲其戰艦而還

九月太尉士誠襲苗帥江浙行省左丞楊完者殺之
遂據杭州初完者帥苗兵屢敗士誠及士誠既降欲
圖之而達識帖睦爾亦厭完者驕橫有却乃陰召士
誠兵共圖之士誠遣史文炳呂珍等引兵襲完者圍
其居完者戰敗及其弟伯顏皆自殺其部將蔣英劉
震等率衆三萬餘人降于李文忠完者死士誠益無
所恃遂據杭州完者部將宋興在嘉興閉城自守尋
亦攻破降之遂并嘉興朝廷詔士信為江浙行省平
章政事自是方面大權悉歸張氏達識徒擁空名而
已

冬十月明徐達克宜興先是達攻宜興久不下乃奉
太祖諭遣丁德興分兵絕太湖口斷其餉道城中軍
士乏食達因併力急攻拔之以元帥楊國興守宜興
廖永安復率舟師乘勝深入擊士誠兵于太湖遇呂
珍與戰後軍不繼舟膠淺遂見執士誠欲降之不屈
乃肉之明太祖欲以所獲將士三千人易永安士誠
不從士誠毋念士德欲以永安易士德太祖亦不許
後士德不食而死永安亦卒于吳

築湖城城據太湖之南濱東西亘百餘里號一字城
復沿城鑿濬以防明師之侵軼又築卽昂土城

士誠遣兵據紹興時元御史大夫拜住哥誘殺行樞
密判官滿里古思紹興亂士誠遂遣兵守之

至正十九年己亥春正月庚申胡大海李文忠取諸
暨守將華元帥遁萬戶沈勝既降復叛大海擊敗之
生擒四千餘人改諸暨為諸全州大海即移兵攻紹
興不能下已而士誠遣將呂珍圍諸全堰水灌城大
海救之奪堰反灌珍營珍窮蹙乃于馬上折矢誓請
各解兵大海許之遂縱珍還

三月士誠大舉兵攻江陰緣壘蔽江部將蘇同僉者
駐君山指畫為進攻狀明守將吳良戒軍士勿輕動

未幾士誠陣于江塢良命弟栢整兵出北門與戰當
其西北面而潛遣元帥王子明率壯士馳出南門既
而士誠分兵欲攻東門子明馳擊之生擒五百餘人
殺溺甚衆士誠兵大敗宵遁先是士誠圖復江陰數
以金帛囑將士竊釁良謹脩之士誠不得逞至是大
舉敗衄為之氣奪

明平章邵榮攻湖州戰不利退屯臨安李伯昇攻之
榮設伏以待伯昇遇伏敗走

三月士誠假建德明守將李文忠禦之于東門使別
將潛出小北門間道純出陣後夾擊大破之尋復進

攻嚴州文忠遣將何世明迎戰于大浪灘破走之士
誠兵據分水嶺世明乘勝逆擊又敗之馘五百餘級
夏四月士誠將李伯昇攻婺源明守將張茂先擊敗
之

明太祖自將攻紹興拔其城以馮國用守之既而國
用卒于軍士誠遂復遣兵陷紹興

秋七月士誠大發浙西諸郡築杭州城壞白塔觀城
九月元徵海運糧于士誠自中原亂士誠與方國珍
分據浙西東江南海漕久不至京師苦飢至是因河
南始平士誠與國珍並降附南北道通朝廷乃遣尚

書伯顏帖木兒曹履亨至杭州以御酒龍衣賜士誠
徵漕貢并詔方國珍治海舟漕士誠粟輸京師而達
識帖睦爾總督之時士誠與國珍互相猜疑使者往
來開諭再三始受命自是歲輸粟以為常

士誠遣兵侵常州吳復督兵出忠節門奮擊大敗之
吳良間道殲其援兵于無錫之三山士誠兵狼狽還
冬十二月士誠復侵建德遣將據分水新城之三溪
李文忠部將吳世明擊之斬其將陸元帥花將軍等
一千餘人焚其營自是士誠不敢窺建婺明改建德
為嚴州府

明常遇春率師攻杭州圍其城

至正二十年庚子春三月常遇春圍杭州失利解圍去

開常熟白茅港白茅受海潮逆上泥淖壅積海口湮塞水不得洩農田患之因發卒數萬開浚又議置爬沙之夫以加疏濬歲以為常自是數郡無水患

夏五月士誠海運糧十一萬石至京師

遣將李濟據濠州初吳國公起自濠及是為士誠所據吳國公因問攻取計于劉基基曰士誠自守虜不足慮陳友諒據上游名號不正且兵力強宜先圖之

友諒平取張氏如探囊物耳吳公善其言姑置之

閏五月陳友諒稱帝于江州國號漢遣使至平江約士誠合兵攻應天士誠許之應天大震既而士誠觀望兵不果出時吳國公患友諒與士誠合曰二寇合我首尾受敵不如先破友諒則東寇膽落矣乃亟令人誘友諒速至破之士誠兵竟不出

按陳友諒約與士誠合兵事在二十年夏友諒初僭帝號欲東攻應天時而原本載在二十三年三月者誤又附載友諒書稱士誠為大吳王殿下尤謬妄士誠稱吳王時友諒已先敗死至友諒奉書

時士誠官太尉安得有大吳王之稱耶又士誠雖許友諒並未出兵原本載士誠議應漢令呂珍張虬以兵十萬從牛渚渡江攻滁州似非寔錄今並

摭史削正

秋九月士誠兵侵諸全明守將袁實戰死又遣呂珍徐義俊長興自太湖分三路入明守將耿炳文擊破之搃管湯全張珙被殺

開常熟鹽鐵等塘

至正二十一年辛丑開賓賢館以禮賓客羈寓之士所贈酒及飲食宮室輿馬供帳甚盛凡四方名士避

地東南者咸歸焉更設儒生立鄉學凡民間遺子弟入學者予以衣冠月給廩米五斗時外患少息士誠亦不為設備專事境內勸農興學信用文吏儒生在國雖號安戢而設險未固識者危之

崑山人郭翼獻策不納翼見太尉日驕縱怠於政事上書曰明公伏馬筵下屢及越數十城望風請服者非能極慮安危力足勝也人若元政久守令貪殘不恤其下故相率離散莫為之守明公誠反其道休勞之然後乘時進取則霸業可成若遽慕晏安耽逸樂不惟精銳坐銷且四方豪傑爭起雖欲閉境自守其

終能乎言甚切直士誠怒欲殺之妻劉止之曰翼策誠善乃得免翼亡去

春三月士誠海運糧十萬石至京師

秋七月以弟同知樞密院事士信鎮淮安左右司員外郎陳基參軍事

秋八月明胡大海攻紹興不克部將張英至城下遇伏死之大海引兵還

冬十月遣司徒李伯昇大舉兵攻長興衆十餘萬水陸並進直薄城下明守將耿炳文禦之城中兵止五千諸將陳德華高費聚等三路進援伯昇夜劫營諸

將皆潰炳文嬰城拒守遣左副元帥劉成出西門迎擊成兵却伯昇追至東門力鬪成戰死伯昇遂悉兵圍之結九寨為樓車下瞰城中運土石填壕隍放火船燒水關攻甚急城中晝夜應敵凡月餘大困

十一月戊午明將常遇春援長興李伯昇解圍遁時吳國公在江州聞長興圍急命常遇春兼程赴救伯昇聞遇春至即拔營走遇春追擊之俘斬五千餘人二十二年壬寅春二月明叛將蔣英殺金華守將胡大海奔降士誠

三月士誠遣兵攻杭州敗還士誠乘浙東亂遣弟士

信與呂珍率兵十萬攻諸全明守將謝再興告急于李文忠文忠以嚴州兵少急檄胡德濟自信州往援且揚言徐右丞達邵平章榮將大軍刻日至以恐敵軍士信果懼謀夜遁呂珍欲退軍五里下營以待決戰德濟乃乘間潛入城與再興分門而守夜半開門帥死士突出砍士信營營中驚亂人馬自相蹂踐遂大潰走

夏四月太尉士誠承制以淮南行省參政饒介為諮議參軍辟楊基為丞相府記室未幾並辭去基轉客介所五月士誠海運糧十三萬石至京師

至正二十三年癸卯春二月士誠遣將呂珍率眾十萬圍宋劉福通于安豐殺福通據其城時福通奉宋
安豐

三月辛丑吳國公自將救安豐呂珍敗走初明師起用宋年號及安豐被圍劉福通使人告急于吳國公公曰安豐破則張士誠益強不可不救遂親率徐達常遇春等救之比至而安豐已破矣呂珍據城列柵盛兵拒守明將汪元帥攻拔其中壘而左右軍敗阻于壘不得出遇春以精騎橫突其脅三戰三勝珍遂大敗廬州左君弼出兵助珍又敗珍與君弼皆走吳

國公乃以林兒歸居之滁州而命達等移兵圍廬州
元將竹昌忻都遂乘間入安豐

按劉辰國初事蹟稱太祖援安豐士誠遁去劉福
通奉林兒退據于滁士誠復入安豐此說誤福通
寔為呂珍所殺安得復奉林兒走滁呂珍遁後安
豐別為元將所據士誠未嘗復入安豐也王世貞
二史考嘗辨之

夏四月乙丑明諸全守將謝再興叛降于士誠初再
興遣人私往杭州販易吳國公怒責之再興懼遂殺
知州樂鳳叅軍李夢庚以諸全軍馬赴紹興降左丞

李文忠聞亂遣胡德濟屯兵五指山下以備之

五月士誠海運糧十三萬石至京師

秋九月降將謝再興以士誠兵侵東陽明李文忠自
嚴州率銳卒馳救胡深亦自處州來援合兵逆戰于
義烏橫突再興陣大敗之因去諸全六十里並五指
山築新城以德濟守之未幾士誠遣李伯昇以十六
萬衆攻圍新城城堅不可拔乃引去

太尉士誠自立為吳王時士誠拓土日廣南抵紹興
北逾徐州達于濟寧之金溝西距汝穎濠泗東薄海
地方二千餘里帶甲數十萬戶口殷盛國用饒富而

吳國公方與漢主陳友諒相持未暇東顧乃益驕令其下頌功德脅達識帖睦爾邀封王爵達識畏之為請于朝至再三元不許士誠乃自立為王改國號曰吳紀元仍曰天祐

尊母曹氏為王太妃曹太妃賢有智識每勸士誠曰元政貪殘故羣思擇主汝惟愛養百姓保全東南毋使塗炭足矣稱王僭號非吾所樂聞也明祖起兵嘗勸其請和又屢乘間言吳越王故事士誠難之立宗廟吳王士誠親告廟還祀社稷羣神置王府官屬定約束

治王宮于郡城中即舊郡治基拓之廣五百畝中為殿取宜興嘉興長興土質之初士誠踞承天寺為宮至是令復為寺

冬十二月元遣戶部侍郎博羅帖木兒來徵漕不與初士誠之降元也叅軍俞思齊實勸其漕貢及是不肯與思齊進曰向為賊不貢今為臣不貢可乎士誠怒抵几仆地思齊見不聽棄官隱自是東南海運始絕

是年鑿九曲河塞至和塘之尾以障海潮

至正二十四年甲辰春正月吳國公朱元璋璋進伐吳

王

吳王士誠議開科取士用經藝令曰省德者有言士之尊聖賢抱大用者心必和平詞抒渾雅自今所取務合經術毋採詭竒乃以隆平北為淮南省南為江浙省分命人典試事

按向稱陳徵主淮楊維禎主浙頗號得人考維禎避地錢唐張吳累使招致不赴且具書諭士誠以順逆成敗之說後來吳嘗一至賓賢館卒不屈旋即放歸豈能為士誠典試事者向所紀恐非寔錄故闕之

夏四月明俞通海張興祖率兵掠劉家港進逼通州吳兵禦之敗院判朱瑣元帥陳勝等百餘人皆被執秋八月吳王士誠遂元丞相達識帖睦迺以其弟士信代為江浙左丞相時右丞答蘭帖木兒即中真保諂事吳王媒孽丞相短士信因數達識帖睦迺罪勒令自陳老病避位又脅將佐上言丞相非士信不可即逼取符印幽之嘉興士信代為丞相

冬十月吳王士誠殺元南臺御史大夫普化帖木兒及丞相達識帖睦迺士誠既幽達識帖睦迺又遣人諷行臺使請于元為真王普化帖睦兒不從即使人

至紹興索其臺印普化帖睦兒怒封印貯庫中曰頭
可斷印不可與又迫之登舟曰身可死義不可辱遂
賦詩二章從容仰藥酒擲楹地上曰我死矣逆賊當
踵我亡也達識帖睦聞之曰大夫已死吾生何為亦
仰藥而死士誠由是專制江浙

冬十月遣丞相士信大發兵攻長興明守將耿炳文
費聚等擊敗之獲其將宋興祖士信憤益兵圍城炳
文聚悉力拒守湯和自常州赴援合擊大敗吳軍士
信走還

吳以芝塘為行府駐節于山涇口命呂珍督民夫十

萬墾其地為港長九十里

丞相士信大治第于東城號丞相府司徒李伯昇亦
亦治第于西城

至正二十五年乙巳春正月吳復攻長興明守將耿
炳文連破之于城下鎮撫歐大智戰死長興為士誠
必爭地炳文拒守凡十年大小數十戰無不勝士誠
迄不得逞自是不敢窺長興

二月吳司徒李伯昇大舉兵攻諸全大敗而還伯昇
挾謝再興以馬步舟師二十萬踰浦江圍諸全之新
城築廬舍建倉庫為持久必拔計明守將吳德濟禦

之遣使至嚴州求救于李文忠文忠帥朱亮祖等馳
救去新城二十里據險為營德濟潛報曰寇勢盛姑
少駐以俟大軍文忠曰兵在謀不在衆彼衆而驕我
少而銳以銳遇驕必克之詰旦會戰天大霧晦冥文
忠集諸將仰天自誓張左右翌待之而自將中軍當
敵衝會胡深以處州兵來援亦至軍氣益奮文忠橫
槩引數十騎乘高馳下衝其中堅伯昇揮精騎圍文
忠數重文忠縱騎馳突所向皆靡大軍乘之德濟亦
帥城中兵鼓譟出吳軍遂大潰逐北數十里斬首數
萬級溪水盡赤獲將校韓謙等六百人甲士三千輜

重鎧伏如山舉之旬日不盡伯昇及五太子僅以身
免

按李文忠鎮嚴州前後與張吳十餘戰皆著奇功
忠勇實為諸將冠而國初事蹟稱文忠在嚴嘗以
事得罪太祖乃密通好于杭州張九四平章既得
報遂謀約降既而悔之乃謀餞張使醉而縛投于
水其說殊誕

冬十月戊戌明下令伐張士誠規取淮東是時明已
西平偽漢乃議東伐左相國徐達平章常遇春等先
取通泰諸郡翦其肘翼然後專事浙西乙巳達兵趨

泰州遇春分兵海安壩以遏吳軍丁未達圍泰州新城擊敗士誠湖北援兵獲元帥王成已酉又擊敗淮安李院判援兵擒萬戶吳聚等

閏十月徐達等克泰州時士誠以舟師四百艘出大江次范蔡港別以小舟于江中出沒為疑兵江陰守將康茂才疑士誠有他謀馳奏請為之備太祖揣知其詐諭徐達等曰寇非敢攻江陰沂上流不過欲我陸兵備水我兵既分彼將棄吾水軍疾趨陸寨擣我之虛此一計也又聞遇春出海安彼將誘之深入潛師以趨海安或泰州令我首尾衝決不相救援又一

計也今遣廖永忠還兵水寨大軍勿輕動彼徘徊江上自老其師乘其懈而擊之破之必矣庚辰遂克泰州擒守將嚴再興夏思忠等九十四人卒五千人馬百六十餘匹船四十艘又分兵徇興化守將李清固守不下

十一月辛卯徐達進攻高郵未下太祖恐達深入重地不能策應諸將乃命馮國勝率所部節制高郵軍達還軍泰州

吳分兵臨宜興徐達自泰州赴救以別將守泰州而自率中軍精兵渡江擊吳軍于宜興城下敗之獲三

千餘人遂復宜興

十二月吳兵攻安吉明守將費子賢擊却之先是吳連歲出兵侵安吉屢為子賢所敗至是復遣張左丞率兵八萬進攻子賢堅壁拒守城上設戰車弩以禦之射殺吳梟將二人吳軍遂驚潰

吳遣左丞徐義率兵援高郵時馮國勝圍高郵守將俞同僉堅守不下密使人至平江求救乃遣義以精兵三萬救之義親望屯崑山之太倉三月不進

至正二十六年丙午春正月吳遣兵趨江陰敗還時吳以水師五百艘駐君山又自馬馱沙沂流窺江陰

明守將吳良戒嚴以待太祖聞親督大軍水陸並進救之比至鎮江吳兵已焚瓜州掠西津去矣乃命康茂才等出大江追之至浮子門吳軍遮海口乘潮迫茂才茂才督諸軍力戰吳良出兵夾擊大敗吳兵降其將秦德等獲卒二千餘人

遣驍將單莊從徐義趨淮安援高郵又遣彭元帥由匏子角趨海安

按原本此條下有王保保將兵南來由天長援高郵之文考王保保固嘗受命南平江淮然以南軍方強未嘗南下僅駐軍河南復以一軍屯濟南防

道南軍而已至二十六年春保保方與李思齊張
良弼等交攻相持經年轉戰西北之不暇而暇將
兵南下援高郵耶當是所傳之誤今削之

三月徐達等克高郵馮國勝圍高郵久守將同僉俞
中詐遣人約降以推女塙為應國勝信之夜遣康泰
率兵千人入城城上急下板閉之皆被殺會徐達自
宜興還軍泰州攻高郵遣使請以孫興祖代常遇春
守海安而遇春督水軍為高郵聲援從之且使諭達
曰高郵為士誠巢穴今攻之彼必來救聞徐義已入
海或由射陽湖或出瓠子角或由寶應趨高郵不可

不備達得書遂會兵合戰一鼓克之斬俞同僉俘將
士千餘人悉遣戍沔辰二州既而海安孫興祖亦擊
敗吳將彭元帥擒之及士卒三百餘人

夏四月徐達常遇春移兵進攻淮安吳左丞徐義駐
兵馬驪港援淮安達乘夜襲破之義泛海道去獲院
判錢富等及卒三千人戰艦百餘艘遂進薄城下淮
安守將右丞梅思祖副樞唐英蕭成等藉軍馬封府
庫出降并獻所部四州達命指揮蔡遷華雲龍守之
徐達還兵克興化先是達徇興化下下太祖令人圖
淮東地形要害見瓠子角為興化要地命達以兵絕

其隘至是遂克興化

明遣平章韓政收復濠州初李濟守濠名為張氏守
寔懷觀望太祖命相國李善長以書招之濟不報太
祖嘆曰濠吾家鄉而失之是我有國而無家也乃命
韓政督顏時等攻之城中拒守甚堅政用雲梯礮石
四面並攻城中不能支庚申濟及知州馬麟以城降
太祖即命時守濠既而徐宿泗顏諸州亦相繼下淮
東悉平

秋八月明太祖以淮東諸郡悉平乃議大舉伐吳李
善長對曰張氏兵力未衰又多積儲恐難猝拔宜伺

隙而動徐達進曰張氏驕橫其將如李伯昇呂珍輩
徒擁聚為富貴之娛參軍王蔡葉三人皆迂濶書生
不知大計臣奉主上威德率精銳聲罪致討三吳計
日可定太祖大喜即簡閱士卒擇日興師庚戌以伐
張士誠祭告大江之神辛亥命徐達為大將軍常遇
春為副將軍率師二十萬伐吳太祖親御戰門集將
佐諭之曰卿等戒飭士卒城下之日毋肆擄掠毋妄
殺戮毋發掘墳墓毋毀廬舍聞士誠母坟墓在城外慎
毋侵毀復御西苑問達等議師行先後常遇春欲直
搗平江太祖曰不然張天麒在杭潘原明在湖彼皆

士誠指臂今若遽攻平江兩人必并力赴投難以取勝不若先攻湖州使疲于奔命指臂既剪平江勢孤立破矣議遂決太祖復密諭徐達曰此謀戒勿洩吾欲遣熊天瑞從行俾為我間天瑞降非本意其心欲叛今但聲言直搗平江彼必叛從張氏以輸此言則隨我計矣癸丑師遂發

明移檄平江數士誠八罪畧言余本濠梁之民起兵救亂賴天地祖宗之靈及將帥之力一鼓而有江左再戰而有浙東陳氏稱號據我上游彭蠡交兵元惡授首其父子兄弟相率歸順既待以不死復封以侯

爵將相皆置于朝班庶民各安于田里荆襄湖廣盡入版圖惟茲姑蘇張氏恃強負固詐降于元坑參政因待制害亟相僭號改元錢糧不貢且誘我叛將掠我西邊民肆其侵擾此興師之故也凡爾人民若能歸順即我良民舊有田廬仍為產業永保家室張氏臣僚或全城歸附或棄刃投降者名爵皆賜余所不吝

按祝允明枝山野記載明祖伐張吳榜文稱龍鳳十二年皇帝聖旨吳王令旨蓋是時尚用宋主年號也

吳王士誠大閱水軍舟艦于胥山令所在將士皆嚴兵固守赦境內今歲秋糧從左丞潘原紹欲出兵先結人心之請也

明徐達率諸軍發龍江聲言直搗平江別遣李文忠趨杭州華雲龍趨嘉興以分吳軍辛酉師入太湖已已吳將尹義陳旺出師湖州港口遇春與戰擒之遂次洞庭山指揮熊天瑞果叛入吳

癸酉明師至湖州之昆山吳將石清汪海守昆山遇春與戰擒之張士信駐兵湖上不敢戰而退

甲戌明師至湖州之三里橋吳分兵三路拒守參政

黃齊當南路院判陶子寔當中路右丞張天麒當北路而以同僉唐傑為後繼明亦分三路兵進攻常遇春攻南路王弼攻北路徐達自以大兵攻中路別遣驍將王國寶率長鎗軍扼其歸路黃齊與遇春戰敗走欲入城橋斷不得入復還力戰被擒天麒子寔不戰退吳遣司徒李伯昇來援由荻港潛入湖州與天麒閉城固守達令王國寶攻南門而自以大軍繼之吳將俞得全院判張得義及陶子寔出戰不利達遂圍其城

吳遣將呂珍朱進五太子及王晟戴茂季成等率兵

六萬人援湖州屯城東之舊館出大軍後築五砦自
固達令遇春等以奇兵由大全港營東阡南之姑嫂
橋更出其後連築十壘以遮絕舊館之援戴茂李成
懼遁去

吳又遣潘元紹屯兵烏鎮為舊館軍聲援達乘夜擊
之遁去遂填塞河港絕其糧道

吳王士誠親督精兵赴援與徐達等戰于皂林大敗
遂歸

九月吳遣同僉徐志堅以輕舟出東門遇春與戰于
姑嫂橋會風雨晝晦令壯士乘划船數百突擊吳軍
擒志堅降其卒二千餘人

吳復遣右丞徐義至舊館覘形勢遇春扼其歸路義
陰遣人約士信引兵來援乃遣赤龍船親兵援義義
得脫遂與潘元紹率赤龍船屯平望別乘小船至烏
鎮欲援舊館遇春由別港追襲之至平望縱火燔其
赤龍船軍資器械俱盡自是舊館援絕

乙未明李文忠攻杭州是時別將廖永忠薛顯將游
軍攻德清克之又遣別將攻紹興

冬十月壬子常遇春攻烏鎮徐義潘元紹敗走遂逐
北至昇山吳平章王晟同僉戴茂軍昇山遇春攻其

陸寨破之晟茂並降餘軍奔入舊館東壁復攻其水寨部將顏時引數舟繞出吳軍吳船上人皆俯視而笑時覺其懈突率壯士數人躍入敵舟大呼奮擊諸舟爭進薄之五太子者盛兵來援遇春兵小却薛顯以舟師直前奮擊五太子燒其船吳軍大潰走遂盡拔昇山水陸寨五太子呂珍朱暹等以舊館降藉其兵得六萬人徐達以呂珍等拘于城下城中大震是月李文忠遣指揮朱亮祖耿天璧分兵攻桐廬守將戴元帥降又遣指揮袁洪孫虎圍富陽克之擒守將同僉李天祿遂合兵攻餘杭

十一月甲申徐達下湖州守將張天麒李伯昇以城降時伯昇協守湖州達百計攻之伯昇亦百計以應不能下至是達遣馮國勝以降將狗城下遙語伯昇出降伯昇在城上言張太尉遇我厚不忍倍之遂抽刀欲自殺左右抱持勸曰援絕勢孤可奈何不如降左丞張天麒總管陳昧大哭曰臣負國矣遂降伯昇不得已亦降

按明史李伯昇以湖州降原本稱湖州下時伯昇遁歸至明年平江將下之時始降者誤

卒郊李文忠下餘杭守將謝五降五再興弟也文忠

諭之降許以不死五遂與再興子五人俱出降文忠
遂進兵杭州

壬辰李文忠入杭州守將潘原明以城降時文忠將
至原明遣負外郎方彛詣軍門納款文忠曰勝負未
分降無乃太早乎對曰杭雖孤城生靈百萬天兵所
至無不摧破特先為民請命耳文忠見其誠許之令
彛還文忠至原明及同僉李勝藉府庫軍馬土地人
民錢穀職貢數及諸司符印并執叛將蔣英劉震出
降以女樂迎文忠麾去之得兵二萬人糧二十一萬
石馬六百匹文忠執元平章丑的長壽等與蔣英劉

震俱檻送應天太祖以原明歸順仍授平章守杭州
聽文忠節制

李文忠進兵攻紹興守將同僉李思忠總管衛良佐
降時華雲龍攻嘉興守將宋興亦以城降浙西諸郡
縣皆下

徐達既下湖州遂會諸將進趨平江至南潯守將王
勝戰敗死之辛丑進攻吳江州駐師城西石里邨遣
人諭知州楊瑛彛以城降參政李福死之

癸卯徐達圍平江達軍從太湖至城南熊魚口擊吳
將齊義義敗走吳遣銳卒迎闕尹山橋康茂才持大

戰督戰走之又焚其官瀆戰艦千餘及積聚甚多大軍遂進圍其城達軍封門常遇春軍虎邱郭子興軍夢門華雲龍軍胥門湯和軍閻門王弼軍盤門張溫軍西門康茂才軍北門耿炳文軍城東北仇成軍城西南何文輝軍城西北四面築長圍困之架木塔與城中浮屠等別築臺三層下瞰城中置弓弩火筒及巨礮其所擊輒糜碎城中大震然堅守不能下明指揮茅成急攻婁門突至外郭中又死指揮楊國興與攻閻門亦戰死

吳無錫守將莫天祐遣部將楊茂至平江被執茂善

泗水天祐潛命入姑蘇與士誠相聞邏卒獲之于閻門水柵送達軍達釋而用之時城堅不可破天祐擁兵為平江聲援達因縱茂出入因得其彼此所遣蠟丸書由是達悉知城中虛實攻圍之計益備

明平章俞通海分兵畧太倉州守將陳仁以大舶百餘艘降崇明知州何求孚崑山知州費復初並率眾降十二月宋主韓林兒卒

明太祖令以明年為吳元年

至正二十七年丁未吳元年春正月太湖澄碧三日庚子吳松江路守將王立中以城降

二月徐達檄俞通海會兵攻姑蘇通海師至與吳軍

戰于滅渡橋搗桃花塢中流矢死

三月吳軍出挑戰與仇成戰于城西南成軍小却
夏四月徐達分兵徇嘉興旁縣皆下之

五月丙子明太祖以書諭降曰蓋聞湯放桀武王伐紂漢祖滅秦古帝之興兵勢相加乃為常事當王莽之亡隋之失國豪傑乘時蜂起圖王業據土地及其定也必歸于一天命所在豈容紛然雖有英雄事業弗成亦當萃心以畏天順民為賢以全身保族為知若漢竇融錢俶是也自古皆然匪今獨異爾能順附其福有餘毋為困守孤城危其兵民自取夷滅為天

下笑士誠得書不報

六月己酉吳王士誠親督兵出戰敗還士誠以被圍久欲突圍決戰覘城左方軍陣嚴整不可犯乃遣徐義潘元紹潛師出西門掩襲轉至閤門將趨遇春營遇春覺之急分兵北濠絕其歸路戰良久未決士誠復遣參政黃哈剌把都率兵千餘助之又自帥精兵出山塘為援山塘路狹塞不可進麾令稍却遇春撫王弼背曰軍中皆稱爾為猛將能為我取此乎弼應聲馳鐵騎揮雙刀奮擊吳軍却遇春因率眾乘之遂大敗人馬溺死沙盆潭甚眾吳有勇勝軍號十條龍

者皆驍猛善鬪每披銀鎧錦衣執大杖出入陣中至是亦悉擠溺萬里橋下而死士誠亦馬驚隨水幾被獲有與入城

吳王士誠既敗歸計忽忽無所出舊將李伯昇知勢迫欲說之降乃遣所善客渝城詣士誠求見士誠召之入曰客欲何言客曰為公言興亡禍福之大計願公安意聽之士誠曰何如客曰公知天數乎昔項羽喑鳴叱咤百戰百勝卒敗垓下天下歸漢祖何則此天數也公初以十八人起高郵元兵百萬圍之此時如猛虎落窠中死在旦夕一旦元兵潰亂公遂乘勝

攻擊東據三吳有地二千里帶甲數十萬南面稱孤此項羽之勢也若能於此時不忘高郵之危苦心勞志收召豪傑度其才能任以職事撫人民練兵旅御將帥有功者賞敗軍者戮使號令嚴明百姓樂用何特三吳可保天下不足定也士誠曰足下爾時不言今復何及客曰爾時雖有言亦不得聞也何則公之子弟親戚將帥羅列中外美衣玉食歌兒舞女日夕酣晏極天下之娛樂猶未厭足提兵者自以為韓白謀畫者自以為蕭曹傲然視天下不復有人當此之時公深居于內敗一軍不知失一地不聞縱知亦不

問故遂至今日士誠歎曰吾亦甚恨無及然則今當何如客曰吾有一策恐公不能從士誠曰不過死耳客曰使死有益于國家有利于子孫固當不然徒自苦爾且公不聞陳友諒乎跨有荆楚兵甲百萬與江左之兵戰於姑孰麀于鄱陽友諒舉火欲燒江左之船天乃反風而焚之卒以兵敗身喪何則天命所在人力無如之何今攻我益急公恃湖州援湖州失嘉興援嘉興失杭州援杭州失今獨守尺寸之城誓以死拒竊慮勢極患生猝有變從中起者此時欲死不得生無所歸故竊以為莫如順天之命自求多福遣

一介之使疾馳金陵稱公所以歸義救民之意公開城門幅巾待命亦不失為萬戶侯况嘗許以實融錢俶故事也且公之地譬之博者得人之物而復失之何損士誠仰首沉慮良久曰足下且休吾將思之然卒謝客竟不降時城中飢甚士誠乃集民告之曰事勢如此余復何策將自縛詣軍門降以救汝曹若死守恐城破之日汝曹無噍類奈何民間皆伏地號哭願效死守

吳徵援兵于無錫守將莫天祐遣兵陣于望亭

壬子吳遣兵突出胥門索戰鋒甚銳遇春接戰稍却

士信方在城樓督戰忽大呼曰軍士疲矣且止且止遂鳴金收兵遇春乘勢追至城下復築壘逼其城士信張幟城上路銀椅與參政謝節等會食左右方進桃未及嘗忽飛礮碎其首而死城中洵懼士誠自是不敢復出

平江圍既久城中食盡時海濱尚有儲粟參政王原恭董綬謀欲出決戰引粟入城不果降將熊天瑞教城中作飛礮以擊外所傷頗多城中木石俱盡至拆祠廟民居為礮具明兵為之退舍徐達乃令軍中架木若屋狀承以竹筴軍伏其下載以攻城矢石不得

傷攻愈急

九月辛巳徐達克平江執吳王士誠以歸時達督將士破葑門遇春亦破閘門新寨遂帥衆渡橋進薄城下樞密唐傑登城拒戰士誠駐軍門內令參政謝節周仁立柵以補外城傑敗不支投降周仁徐義藩元紹及錢叅政等皆納款請降時吳軍大潰城遂陷諸將蟻附登城民皆慟哭執梃巷戰士誠使副樞密劉毅收餘兵尚三二萬親率之戰于萬壽寺東街復敗毅被執士誠舍皇歸從者數騎耳初士誠戰屢敗謂其妻劉氏曰我敗且死矣若曹何為劉氏曰君勿

憂妾必不獨生乃積薪齊雲樓下以待及城破驅其
群妾侍女登樓促其自盡令養子辰保縱火焚之遂
自縊死士誠歸烟燭未息妻妾皆燼左右散走獨坐
室中徐達遣李伯昇諭意時已薄暮士誠方拒戶自
經伯昇決戶入令故部將趙世雄抱解之復甦勸曰
九四英雄患無身耳達又令潘元紹勸諭之反覆激
四士誠瞑目不答乃以舊盾鼻出封門途中易以戶
扉至舟中閉目不食遂傳送應天徐達籍所獲官屬
平章李行素馬玉麟叅政陳恭謝節董綬王原恭右
丞徐義左丞潘元紹同僉高禮內史陳基饒介等所
部將校及杭湖嘉興松江等群官吏家屬并外郎流
寓之人凡二十餘萬人并元宗室神保大王黑漢等
九人皆送應天先是城久不下常遇春忿曰城下之
日三歲小兒亦當斬及城之將破也達與遇春約曰
師入我營其左公營其右且令將士曰掠民財者死
殺降者死毀民居者死既入吳人安堵如故
丁亥徐達還師取無錫守將莫天祐降天祐守無錫
達屢遣人諭降俱被殺至是令平章胡廷瑞急攻之
天祐猶堅守不下州人張昱知事急率父老見天祐
曰吾民為張氏守十二年矣張氏已就縛固守將為

誰願熟思之天祐擲其帽于地曰誰不知降也乃降
按明史莫天祐以無錫降而原本稱天祐出兵高
橋戰敗被執自刎者自是傳聞之誤

徐達分兵徇南通州時太祖命秦州指揮孫興往取
通州比至而達兵已至其守將張右丞即士誠從子
所謂大眼張者聞士誠被執亦舉城降吳地悉平
己丑吳王士誠至應天自殺士誠至龍江閉堅臥不
肯起昇至中書省與語問所欲不答昇入朝不跪亦
不言太祖以其英傑能得民心欲全之反覆與語乃
張目答曰天日照公不照我自好為之母多言終不

食自縊而死年四十七太祖命具棺葬之
冬十月明改平江路為蘇州府其明年春吳王朱元
璋即皇帝位國號明建元洪武秋遂滅元

隆平紀事上卷終



國家圖書館, NATIONAL CENTRAL LIBRARY, TAIWAN, R.O.C.

隆平紀事上卷終

隆平紀事卷下

松陵史 冊義維纂輯

震澤曹 森卓亭
從孫史開基體仁 泰訂

至正壬辰春城平江于古城基內掘得一碑其文云
三十六十八子寅卯年至辰巳合收張翼同為制不
在常不在揚切須數數細思量且卜水莫問米浮岡
地莫扶起修古岸重開河軍民拍手笑呵呵日出屋
東頭鯉魚山上游星從月裏過會在午年頭右不曉
所言何事或謂三十六四九也張翼已午之交也後
一年癸巳張士誠起兵第行九四而同首亂者適十

八人

士誠起事時義社十八人李伯昇潘原明潘元紹莫天祐莫天錫徐義徐志堅韓謙錢輔宋興祖張天麒俞中李寧花同歿呂珍五太子及其弟士義士德士信也吳七時士義三人皆前死餘無一人死難者士誠為人遲重寡言似有器量然無遠圖自專制江浙漸驕逸委政于弟士信女夫潘元紹及三參軍等士信元紹尤好聚斂金玉珍寶嗜聲伎日夜歌舞以自娛將帥亦偃蹇不用命每稱疾臥不起要官爵田宅然後強出戰軍中多載姬妾樂器或大會游談

之士擄蒲蹴鞠為戲樂及喪師失地士誠皆置不問已乃仍用為將上恬下嬉以迄於亡

張士德小字九六勇鷲善聞且得士卒心士誠畧定江南浙西地皆士德功明師下常熟被執不屈寓書力勸士誠降元以拒明既沒于金陵元追封士德為楚國公立廟崑山祀之徵楊維禎為楚國公碑文楊有謝張太尉賜玳瑁筆詩所云老夫未草平蠻策先為新封楚國碑是也又席帽山人王逢有游崑山懷舊傷今詩云丈夫貴善後事或失謀始桓桓張楚國挺生海陵鄙一門蓄大志羣雄適蜂起元珠探覽社

白馬飲浙水三年車轍南北向復同軌量容甘公說
情厚穆生醴誓擊社逃揖竟折孫策蠶天王詔褒贈
守將躬歲祀翼然東崑邱蘭橈映䟽綺青蔡春荐豆
翠栢寒動梁乾坤有孤臣風雨招五鬼銅駝使有覺
存懼臥荆祀蓋逢寔始為楚國公畫降元之策者故
于其沒有餘詞焉又陳學士基有舟中望虞山有感
詩云一望虞山一愴然楚公曾此將樓船問閔百戰
捐軀地慷慨孤忠罵賊年填海欲銜精衛石驅狼愿
假祖龍鞭至今父老猶垂淚花落春城泣杜鵑此亦
感士德被擒事而作

按據陳詩作証諸史稱士德被擒于常州者誤也
士信小字九七性荒淫惟務酒色嬉娛自通殺達識
帖睦爾代為丞相遂益驕吳人側目嘗出鎮淮安陳
學士基參軍事有詩云桓桓霍將軍出入光百碎位
重言益卑功高志彌抑蓋諷之也平江之周士信為
龍井炮擊死山陰楊維禎作詞將軍詞以刺之云銅
將軍無目視有準無耳聽有神高紗紅帽鉄篙子南
來開府稱藩臣兵強國富結四隣上稟正朔天王尊
阿第住國東國鈞借逼大兒稱孤君案前火勢十妖
嬖後宮春艷千花媚水犀萬弩填震澤河丁萬鍾輸

茅津神愁鬼憤哭萬民銅將軍天假手疾雷一擊粉
碎千金身斬妖蔓拔禍根烈火三日燒碧雲鉄篙子
面轉西向為吳賓

李伯昇潘原明與士誠同起泰州為義社十八人之
長伯昇位司徒最用事後以湖州降明太祖命仍故
官進位平章同知詹事府事又為征南右副將軍原
明以平章守杭州降太祖亦命仍故官後署雲南布
政司事與伯昇並歲食祿七百五十石不治事張吳
諸臣降明者二人最見優禮云

按剪勝野聞稱司徒李伯昇先以國情輸我師太
祖以為佞臣使斬以示士誠枝山野記所載亦同
皆誤也原本稱伯昇至金陵自謂必得重賞太祖
曰丁公之僕謂何乃殺丁士誠之前云云蓋亦沿
野聞野記二書之誤考明史伯昇任明其子猶世
襲指揮何云見殺

呂珍字國寶泰州人驍勇敢戰與朱暹同為士誠親
信宿將倚為爪牙以同發守紹興屢敗方國珍兵
要其餉構後援湖州屯舊館營廓草萊兵甯濟以襲
明師每戰輒為歌令其帳下兒及城中人歌以諷敵
兵稱為虎將常遇春亦畏其鋒為之徙營卒敗與朱

進俱降士誠為之喪氣

按史呂珍以雋館降而何稱珍入衛姑蘇見時勢日感憂憤成疾而終蓋所傳之誤

五太子者姓梁名寄高郵人為士誠養子故號五太子短小精悍能平地躍起丈餘又善沒水轉鬪無前與呂珍朱進率兵援湖州屯雋館常遇春攻昇山水寨五太子盛兵來接遇春為却薛顯燒其船遂敗以雋館降

按五太子與呂珍朱進同降而何稱其援昇山水寨一夕暴卒亦恐非實錄

潘元紹字仲昭其先本趙氏為宋裔宋亡辟禍易姓潘元紹士誠女夫也為江浙行省左丞性奢侈耽聲色有姬七人皆慧麗姑蘇園急元紹戰敗歸召七姬謂曰我受國重寄義不顧家脫有不宿誠若等宜自引決毋為人恥最少一姬段氏跪而前涕泣請即死曰毋令公疑遂自縊六姬者亦相繼縊至正丁未七月也元紹斂其屍同瘞後周張羽為作七姬權厝志高啓為作七姬塚詩陳基作群珠碎詞元紹又嘗納美娼數十有蘇氏絕艷最寵一日醉後忽殺之以金盤荐其首出晏客後平江破擒元紹至臺城殺之投

其首于淵會稽楊維禎感其事賦金盤美人詞云昨夜金牀喜喜薦美人體今日金盤愁愁荐美人頭明朝使君在何處淵中人溺血骷髏君不見東山晏上琵琶骨夜夜鬼語啼篋篋

莫天祐興化人有膂力善格聞張吳起兵時列義社中攻臨盱眙濠泗其力居多士誠降元後表天祐尚僉樞密院事守無錫州平江之圍天祐令部將楊茂奉蠟書沒水入城通問書中有一成興夏五千復越之語為徐達軍所獲連屢遣使諭天祐降皆被殺及平江破諸城皆下惟天祐猶堅守明師急攻之乃降

太祖以其多傷兵士殺之

按莫天祐與張吳同起事列義社十八人之中而明史稱天祐元末聚眾保無錫州士誠招之不從攻之亦不克及士誠既受元官天祐乃降士誠表為同僉樞密院事云云所傳異詞未知孰是

徐義者亦列義社中同謀起事後典親軍官至右丞與李伯昇呂珍同為張吳所倚重然用兵善敗數奔營援高郵頓兵不進援淮安遠遁入海援湖州一阨于蕩館再敗于烏鎮至平江破遂被執

竇義字德剛泰州人初從張士德泛海取通州臨太

倉諸將多取金帛子女義獨誠其下無秋毫犯遷吳
時義力言淮海上游四鄰多勍敵不宜置戶外士誠
雖善之而不能用署參軍進參政守平望明師燒赤
龍船義部獨全更率舟師屯鮎魚口兵敗遁去不知
所終

史椿字長年嘉興人初士誠設禮賢館聘名士居其
中椿與弟榮俱以文學被寵遇既而署椿部將為謀
主椿說士誠收召豪傑不宜專任所親左丞徐義諧
之出守淮安明太祖定金陵椿勸士誠效錢賓故事
不聽乃潛遣人納款金陵事洩士誠遣人追殺之于

舊館城下

王晟官左丞為吳部將嘗薦席帽山人王逢且贈之
馬逢以詩辭又與楊維禎善嘗微行松江步謁草元
閣移酒船晏閣所楊贈詩有微行誰識王丞相草履
過門如野人之句又有臥雲道人今左轄當時出岫
本無心隆中豪傑微初起江上蒼生望正深云云後
與同僉戴茂援湖州屯昇山為常遇春所敗與茂俱
降

周仁本山陽鍛工也資性刻深稍習吏事淮張入吳
署為隆平太守與士德同心協力躬親細故以聚斂

功至上卿吳亡俘至金陵仁曰錢穀鹽鐵籍皆在我
汝國欲富當勿殺我主者怒曰七國賊尚敢言是耶
速殺之吳人聞或手額謝天曰今日天開眼也楊廉
夫為作周鐵星詞曰周鐵星國上卿談申韓為法經
釘筮杖為國刑千倉萬庫內外盈十有二賦爭科名
周鐵星鞭笞集斂無時停開血河築血城血戰艦血
軍營刮民膏啣民髓六郡赤骨填芻靈齊雲倚天一
日傾鉄星亡國法當烹尚將六郡金谷數丐死萬一
充虞衡嗚呼周鐵星十抽一椎百萬釘誓剗爾髓作
溺嬰鐵星碎地啓暗天開顏

按周仁楊廉夫集作周俵

朱英者本江陰盜也至正乙未江陰軍寇互相吞啖
英與江宗三分黨戕殺宗三將入城殺英英時就招
安為判官州之僚佐無如之何遂申白江浙行省云
朱英謀反省遣元帥觀孫歷境觀孫逗遛不進英因
乘間挈家逸去過江至高郵求救于張士誠借兵復
仇士誠由此定渡江之策後仕吳官平章

三參軍者王敬夫蔡彥文葉德新皆書生不知大計
又諂佞事蒙蔽時吳中有十七字謠云丞相做事業
專用王蔡葉一朝西風起乾癟後平江破俘至臺城

明太祖命劉三參軍薰于旗竿之首果如謠云山陰
楊維禎為作蔡葉行云君不見偽吳兄弟四六七十
年強兵富金穀大兄垂旒不下堂小弟秉鈞獨當國
山陰蔡藥師雲陽葉星卜朝坐白玉堂暮宿黃金屋
文不談周召武不談頗牧機務托腹心邊策憑耳目
弄臣什什引膝前骨鯁孤孤內囚牯去年東臺殺普
化今年南垣殺鐵木鳳陵剖棺取含珠鯨海刮商剝
沉玉粥宮隨地進妖艷籠貨無時滿坑谷西風捲地
來六部下披竹朽索不馭六馬奔腐木那支五樓覆
大越先罪魁餘殃盡拏戮寄謝悠悠佞倖兒福不盈

眦禍連族何如吳門市賣藥賣卜餓死亦足

淮張兵起元臣死難者甚多趙璉字國器潁州人以
叅知政事鎮泰州死之李齊字公平廣平人以進士
第一人歷官知高郵府死之時論謂齊與秦不華李
黼為大科三魁皆不負所學淮東廉訪使褚不華字
君寔石樓人死淮安淮南行省照磨盛昭字克明歸
德人淮東宣慰司掾納速刺丁字士瞻大名人樞密
院都事石普字元周徐州人集賢待制孫撫字自謙
曹州人並先後死高郵江浙行省丞相達識帖睦迺
死嘉興行臺御史大夫普化帖木兒死紹興以上凡

詳上其餘忠節之士尚多畧誌其人于左

楊椿字子壽吳人以尚書試藝于有司屢屈至正丙申張士德攻平江參政脫寅守吳辟椿為參謀俾守婁門入幕之明日淮兵即附城椿戎衣率其卒晝夜守比明守臣皆遁去寇奪門入椿匹馬彎弓督民伍接戰大罵寇以戟裂其口罵不絕而死椿門人陳普居郡城兵至其門使拜不屈且罵曰若所為寇耳遂亦死之

楊乘字文載濱州人仕元為江浙行省員外郎以事免官居松江青龍鎮至正丙申淮張陷平江及松江

乘日與故人酣飲每嗷呼曰吾知所以自處矣七月士誠遣所署吳縣丞張經松江府判官馬信之具禮幣造門致之乘曰吾廢處田里久不足以辱使者請置幣禮門外某氏家當擇日具禮受命經等如其言乘命子卣卓其醴告祖禰既竣事復命酒飲逮暮起行後圃顧西日晴好慨然曰晚節如是足矣命卣等治畦處置家事如平時撫其孫虎林怡怡如也歸坐至夜分二子立待命曰二子行且休吾將就寢詰旦卣等怪寢門未啟發視則已自經得手書大約言死生晝夜之理且以得全晚節為快

按此据金網揚貞外郎傳及輟耕錄至原本續宏
簡錄所載與此異云淮張下平江有郭良弼董綬
者先仕元後從張吳游因盛稱楊秉才士誠因遣
張經往徵秉乘曰良弼等皆名臣今已失節願欲
引我耶且讓經平日所讀何書今日所事何主經
曰禮賢下士振窮卹苦莫若張王是以委身乘曰
昔周武王慢士虐民而夷齊仇之耶經俛首不能
對促行愈急乘退遂整衣冠自經死

李棠卿樂平人為無錫州倉使淮張攻無錫棠卿抱
印避草澤間士誠以倉印故購之急棠卿度不得脫

遣人懷印間道納之之行省尋被執誘以仕不屈囚
繫死獄中

劉良常州萬戶府知事也淮張圍常州援兵不至良
遣其子毅齎蠟書間道抵江浙求救未及還而城陷
良不屈閣門赴水死時武進縣戶萬溶當常州陷時
率民兵戰于葛橋南死之

尤鼎臣為嘉定吏至正中海寇數入婁江參政寶哥
頓兵無戰意鼎臣從州倅在兵間屢著謀效及淮張
入吳倅奉印降鼎臣力阻不得為其將所執啗以美
官不屈杖之百餘終身錮之江陰王逢以詩弔之云

長貧故吏身姓尤一刀筆擁千夫矛南垣參政但醉
酒海若不敢東窺要淮張崛起連吳臺屬臣賣降恐
後來躡階阻獻嘉定印杖錮非謫天全才坐中光氣
虹霓吐屋山亂葉吹黃雨舊除今辟置勿數鬼區冥
冥蒿中柱吁嗟猶思石磬鼓

張介福字子祺軍懷人徙吳少慕鄉先生許衡遂軒
軒以禮自持淮張兵入吳掠其家端坐不動兵脇令
導諸富家不從乃以刀砍其面流血仆地醒復起戴
冠危坐顏色自若兵怪之以為異物走去後因親墓
在城西恐盜發之遂長廬墓側士誠聞欲強致之不

可使其弟往問答曰無樂亂無貪天禍無忘國家餽
之力辭及將卒謂其友曰吾志希古人未能也惟無
污于時庶幾哉

月魯不花字彥明蒙古遜都思氏官浙江廉訪使時
張士誠據浙西借王號月魯不花在紹興度勿可與
共乃具舟載妻子而自匿木柜中蔽以葉結走慶元
時有管軍百戶鄒世聞者登州人戍海寧會張氏陷
浙西世聞遂屏居峽石不食死

張吳雅好文士開宏文賓賢諸館又築景賢樓以為
招賢之所贈遺與馬居室服食什器甚具以故吳中

才雋及四方文學知名士避兵僑寓者多歸之或居
賓位或就僚屬或主謀議或典文章彬彬焉盛于東
南雖卒無救于敗亡然其卓然才學表著者不可沒
也用著其人于左

周伯琦字伯溫號玉雪坡真逸鄱陽人仕元以文學
居館閣有聲後出為江夏廉訪使過長鎗軍遁入杭
至正丁酉行省假伯琦參知政事往平江招諭士誠
見之大喜留之署同知太常禮儀院事尋拜江浙行
省左丞後除行御史臺侍御史伯琦儀觀溫雅粹然
如玉博學工文章篆隸真草尤擅名著六書正譌說

文字原二書梓于平江路儒學張吳以賓禮待之為
建第宅于干將坊內乘魚橋北號老相公衙厚其廩
餼以矜式國中留吳十年日與諸文士觴咏流連忘
歸吳平乃歸鄱陽尋卒史論謂伯琦遭時多艱善于
自保而致身之義有闕云

按剪勝野聞稱太祖平吳見周伯琦先賜大醉三
日後殺之考伯琦寔歸里而卒未嘗見殺席帽山
人挽周侍御詩有含悽歌黍離委順正邱首之句
足証野聞之訛

鄭元佑字明德遂昌人徙錢塘年十五能詩賦為文

力追古作者時咸淳諸老猶在皆折節下之再徙平
江臺省交章薦不就至正十七年授平江路學教授
旋移疾免又擢江浙儒學提舉數日卒元佑居吳依
張氏為賓賢館中第一人詩曰僑吳集

陳基字敬初台州臨海人從其師黃潛游京師授經
筵檢討以事引避歸里已而奉母入吳以江浙左右
司員外郎參張士信軍事于淮安改參太尉府軍事
太尉稱王基獨力諫不聽尋授內史遷學士院學士
一時書檄碑銘傳記多出基手基在吳得小園于天
心里以台州有丹邱因號小丹邱吳平明太祖召基

修元史賜金而還初張吳與明相持基在其幕府為
書檄多所指斥及吳亡吳臣多見誅基獨免世所傳
夷白集其指斥之文猶備列云

饒介字介之臨川人自翰林應奉出僉江浙廉訪司
事張氏攻平江介分守齊門兵潰城陷介閉門高臥
士誠慕其名累使強起之更自往造請表為淮南行
省參政署諮議叅軍與陳基同典文章家采蓮涇上
介豪于詩在吳多羅致四方名士為幕客日以觴咏
為事吳亡後入金陵見殺

張憲字思廉山陰人號玉筍生學詩于楊維禎最為

所許負才不羈嘗恣言天下事衆駭其狂張吳辟為
樞密院都事吳亡遁去變姓名寄食杭州報國寺人
莫識也旦暮手一編不釋人不得窺夜即枕之臥及
歿人視之其所作詩玉筍集也乃知為憲云凡士誠
賓客不倍士誠者止憲一人初玉筍生應吳聘楊廉
夫送以詩云近報淮吳張柱國樓船遣使聘嘉賓漢
家自有無雙士趙客何勞十九人天上瓊花回后土
江南杜宇到天津若逢呂相煩相問應有奇書痛絕
秦呂相指同僉呂國寶珍也

戴良字叔能浦江人仕元為江浙行省儒學提舉見

時事不可為避地吳中依張士誠久之見士誠將敗
即挈家泛海後南還變姓名隱于四明山元亡良不
忘故主每形于歌詩明祖物色得之欲授以官固辭
忤旨乃自殺

王逢字元吉江陰人避亂吳中號最閑園丁淮藩徵
為帥幕辭嘗為張士德畫策使北降于元以拒明士
德用逢策遂勸士誠定降元之計左丞王晟因薦逢
擢淮省都事又辭吳亡明祖欲辟用之堅臥不起隱
上海之烏涇自稱席帽山人有聞吳門消息詩云唇
亡遂使諸蕃感板蕩將貽上國憂蓋張吳賓客中惟

戴良與逢始終心不忘元云

孫作字大雅江陰人元季挈家辟兵于吳盡棄他物獨載書而麗士誠廩祿之旋以母病謝去衆為買田築室居之嘗著書十二篇號東家子宋濂為作東家子傳後仕明至國子司業

楊基字孟載蜀人居吳遭亂隱赤山著書十餘萬言名曰論鑿張吳辟為丞相府記室未幾辭去客饒介所明師下平江基以饒氏客徙臨濠後起累官至按察使

徐賁字幼文蜀人徙居平江北郭與高啟諸人為北

郭十友工詩善畫山水張吳辟為屬俄謝去居湖州之蜀山吳亡謫徙臨濠後以薦起仕至河南布政使唐肅字處敬山陰人入吳居北郭博學無不通張吳時為杭州黃岡書院山長遷嘉興路儒學正吳亡例赴京又魯淵字道原淳安人官浙西副提舉張氏稱王擢博士

余堯臣字唐卿永嘉人客會稽呂珍羅致幕下與有保越之功已而入吳居北郭為士誠客城破例徙臨濠

蘇大年字昌齡以字行真定人元末官翰林院編修

亂後避兵居吳張士誠開藩時用為叅謀稱蘓學士
楊廉夫寄以詩云東吳王者尊師相師相匡君近若
何紫極正宜扶日月鴻溝未許割山河金臺百犬媒
燕隗蓋祿千鍾客孟軻亦有陽秋成鐵史姓名不必
到鑿坡大年工詩文善畫晚年自號西坡又稱林屋
洞主先吳亡而卒

姜漸字羽儀諸暨人至正間以兵變僑居吳為諸生
張氏辟為淮南行中書左右司都事未幾以疾辭杜
門以著述為事

陳秀民字廢子温州人博學善書至正中知常熟州

張氏禮致為叅軍歷江浙行中書省叅知政事翰林
學士入明後不知所終

陳汝言字惟允本家廬山五老峰下父徵字明善始
居吳兄汝秩並有雋才汝言尤憫儻知兵張氏時客
潘原明所辟藩府叅謀親信用事聲勢甚盛嘗騎馬
過吳市遇王行方徒步汝言不為下以手招之曰王
止仲可來吾家看畫王尾之往勿敢後其矜伉如此
後仕明官濟南經歷坐法死汝言善畫嘗為王叔明
改岱宗密雪圖叔明叫絕以為神奇及臨難從容染
翰畫畢就刑云

張經字德常金壇人父監字天民時稱張有道至正
丙申張士德渡江選令丞簿尉中十有一人經典選
起為吳縣丞歷縣尹同知嘉定州調松江府判所至
有惠政人歌思之經歷任遷轉皆出淮藩時人有詩
云楚公賓客誰最賢又曰肝膽豈能酌楚國蓋士德
號知人能得士如此

錢用壬字成夫桐川人仕元為翰林國史院編修歷
官江浙行省左右司員外郎移守淮安擢太尉府叅
軍又叅平章張士信軍事于淮安升叅政鎮淮徐邳
三州後任明為禮部尚書

郭翼字義仲崑山人為文追古作者楊維禎稱其文
可方軌西京翌素有志嘗上書吳王士誠以為不
宜慕晏安軌逸樂言甚切直士誠怒欲殺之而其妻
劉夫人力諫止翼因得亡去耕塋上自號東郭生又
自稱野翁所著有林外野言

按原本稱郭翼為同僉院判考慮熊所撰遷善先
生郭若墓誌銘但稱翼以訓導老于學官初不言
為同僉院判豈諱之耶今姑附識於此

盧熊字公武崑山人少從楊維禎學博學工文詞尤
精篆籀張吳時為吳學教諭奉母居平江平江破熊

被創甚例遣赴金陵後起官至兗州知州
尤義字行之長洲人父玘位大司徒開國魏郡公義
長身美髯聲如洪鐘膂力絕人沉鷲多韜畧江淮兵
起義保障鄉里有功授官不拜及張氏據吳薦于朝
授浙江宣慰管平江尹府事義懼不敢辭旋以憂卒
子國祥博學通經兼善騎射朝廷詔權父職張氏強
驅用之平營之戰死焉

按尤義以武畧著迫脅于張氏非如周伯琦以下
諸人以文士依歸者比然亦嘗為張氏用故附列
諸人後

吳開賓賢館多招致名流然貧無籍者亦爭趨之往
往美官爵豐廩祿以得志一時好事者有作北樂府
以嘲之云皂羅襪兒紫紵衫頭帶方簷帽穿領闊袖
衫坐個四人轎又是張吳王米蟲來到了聞者傳以
為笑至若見幾高蹈之士有張吳所不能招致者數
人今亦著列于左

楊維禎字廉夫山陰人少讀書缺崖中因自號缺崖
又自稱東維子初以進士歷官江西儒學提舉會兵
亂避地富春山徙錢塘張氏據浙西慕其名累使招
之不赴復遣其第士信咨訪之因撰五論反覆告以

順逆成敗之說且具書復士誠曰閣下乘亂起兵獎
王室淮吳之人萬口一辭以閣下所為有不可及者
四兵不嗜殺一也聞善言則拜二也儉于自奉三也
厚給吏祿姦貪必誅四也此東南豪傑望閣下之足
與有為也雖然為閣下將帥者有生之心無死之志
矣為閣下守令者有奉上之道無恤下之政矣為閣
下宗族姍黨者無制祿之法有奸佞之權矣假佞以
為忠託詐以為直飾貪虐以為廉最可畏者動民力
以搖邦本用吏術以括田租銓放私人不承制出納
國廩不上輸受降人不疑任忠臣而復貳六者有一

足以喪邦閣下不可不省也夫當可為之時有可乘
之勢迄無成効其故何歟為閣下計者少而自謀者
多也維楨老且病爵祿不以干閣下幸采其言小可
以為錢鏐大可以為晉重耳齊小白否則身犯六畏
不有內變必有外禍始憶維楨言嗚呼晚矣士誠不
能用又忤達識丞相徒居平江嘗有上張太尉詩云
珍重晉公經濟手中興天子復神州蓋猶以擁戴王
室期之也一日偶來吳門士誠聞強使邀之乃不得
已一詣賓賢館時朝廷方以龍衣御酒賜士誠士誠
以康夫至喜甚即命飲以御酒酒酣以指畫塵几作

一絕云江南日日烽烟起海上年年御酒來如此烽
烟如此酒老夫懷抱幾時開張見之知終不就遂放
歸後明祖以前朝老文學再遣使奉書幣徵之維楨
賦老客婦謠以進安車一詣闕即還山

顧德輝字仲瑛一名阿英崑山人少豪俠自喜後乃
折節讀書築玉山草堂于芳涇西日與四方名士張
翥楊維禎倪瓚諸人為雅集淮張據吳欲強以官乃
奉母去隱吳興之高溪以母喪歸綽溪士誠再辟之
辭不獲乃髡髮廬墓且營壽藏自為志銘稱金粟道
人題其像曰儒衣僧帽道人鞋天下青山骨可埋若

說向時豪俠處五陵鞍馬洛陽街吳亡與其子元臣
並徙濠梁

倪瓚字元鎮號雲林子無錫人值元季亂盡散家資
獨往來江湖間初張士信聞瓚善畫使人持絹角以
重幣欲求畫瓚怒曰倪瓚不能為王門畫師即裂去
其絹士信深啣之一日士信與諸文士泛太湖聞小
舟中有異香士信曰此必一勝流急榜舟近之乃瓚
也士信見大怒欲手刃之諸人力營救乃免然猶鞭
之倪被鞭竟不比一語人問倪君被辱何乃不發一
語答曰一說便俗瓚常過蘇臺賦懷古詩以寓意云

望中烟草古長洲
不見當時麋鹿遊
滿目越來溪上
水流將春夢過杭州

高啓字季迪長洲人工詩文初居城東北陬張氏據吳故去依外家居吳淞江之青邱時饒介為張氏上佐多羅致文學知名士為幕客啓為首冠然卒不為張氏屈

陶宗儀字九成黃岩人好古工文章避兵三吳間張氏署為軍諮不就藝圃一區耕餘以筆墨自隨時輟耕樹陰抱膝而歎每紀一事輒摘葉書之貯一破盞去則埋于樹根後累盞至數十因盡發所埋錄之題

曰南邨輟耕錄

貝瓊字廷臣一字廷璠崇德人士誠據吳隱于及山累徵不就

邵光祖字宏道父宦游來吳因家焉博學好古尤精研六書之旨著韻書四卷辟為湖州學正不赴以布衣終又王穀字伯純河東人寓華亭張太尉辟為常熟州教授力辭

宋克字仲溫長洲人博學工書尤以章草名任使學兵法周流無所益以氣自豪張吳欲羅致之度其無成不就

王鑑字明卿真定人少學于虞集父瑁為吳縣尹鑑
省親因居吳日從縉紳諸老講究經義隱居杜門家
貧無担石儲未嘗以私干人士誠入吳獨造廬訪鑑
每導以仁義得民士誠嘉納嘗語人曰明卿高世
士吾益友也後鑑疾士誠遣善醫候視及卒命有司
卹其家塋之橫山

焦白字任道淮人流寓吳中才志不羈以詩畫自適
張氏辟為湖州教授不就因變姓名寄食嘉定一
夕心動省母吳城為門校察知有司敦迫至力乞歸
養或諷曰君頽而長髯黃金加鞋爵列侯等不愈于

帶索耶白不容

張昱字光弼廬陵人參左丞楊完者軍府事遷杭省
左右司員外郎完者死昱棄官不出張太尉禮致之
不屈居西湖放情詩酒憤張氏擅權策其必敗題詩
寓意云一陣東風一陣寒芭蕉長過石欄杆只消幾
度帶騰醉看得春風到牡丹昱嘗奉丞相委入姑蘇
索各官俸米因賦詩呈太尉有相君求米如求雨員
外得船如得仙之句又有辭答太尉見招詩云中年
晚覺壯心去涉世頗知前事非若使范增能少用肯
教劉表失相依風雲天上渾無定麟鳳人間不受羈

殘夢已隨舟楫遠五湖春水一鷗飛

錢惟善字思復錢塘人號曲江居士長于毛氏詩學工書法仕元官副提舉張氏據吳惟善不屈退隱吳江之筒川與楊廉夫唱和有句云笠澤水寒魚尾赤洞庭霜落樹頭紅又曰漢史丁公那及齒陶詩甲子不書年蓋感時事也

董遠字仁仲天台人入吳止天平山復寓松陵之梅花莊張王聞遠名奉書幣迎之遠受書返幣堅臥不起使再及門乃避地錦峰依浮圖以居洪武中以薦起為莆田令

王思忠吳江人雅尚文學張氏據吳屢徵不至率義勇保障鄉閭後徐達兵下吳江頓師石里却知州楊葵驚遁不知所出思忠勸葵率眾歸附達嘉之賜思忠旗號使鎮守焉

秦裕伯字景容大名人仕元累官福建行省郎中棄官客揚州復避地上海居毋喪盡禮張王遣使招之拒不納後明祖累使徵之不得已強起官至治書侍御史

右張吳所不能致者凡若干人按原本稱士誠常遣使聘陶安及劉基俱辭不至此二人之聘恐未

有據又剪勝野聞稱劉基過蘇見士誠曰肯不及
封侯何可久也登虎邱曰天子氣尚在吳頭楚尾
云云考張吳時基寔未嘗至蘇其說俱未可信故
不載

繆孝子倫字叔彞東平人侍父官游寓錢塘至正丙
申淮張兵入杭執其父將殺之倫哀號乞免勿聽備
家資以贖又勿聽乃自縛請代于是殺倫而釋其父
高郵張氏女有艷姿淮張兵破城時兵叩女家索女
不得將害其父母女不得已出拜賊挾之行女欣然
從過橋忽投水死又同郡高氏婦方携女從夫出避

兵度不免入道旁空舍脫金纏臂與女且語夫令疾
行遂自縊夫抵儀真夜夢婦來告曰吾已縊彼舍矣
朱氏杭州黃仲起妻也與女臨安奴俱有姿色至正
丙申淮張兵破杭州臨安奴倉皇言曰賊至矣我別
母求一死也俄而兵擄諸婦至其家指朱氏母子曰
為我守此日暮我當來朱懼辱與女俱縊其妻馮氏
亦縊繼而仲起弟妻蔡抱幼子與乳母湯皆自縊士
誠聞之表其閭曰一門五烈

劉節婦泰州坂榆人至正丙申隨父渡江居吳門適
張士誠部將曹某龍潭之戰夫陣亡劉冒凶險赴死

所求其屍歸葬欲以身殉父不許既而權貴人聞劉美且賢爭欲強委禽馬劉以死誓遂刳面削髮士誠命旌之

王氏吳人楊椿妻也淮兵入平江椿力戰死王氏披髮徒跣尋屍三日不得兵屢欲及之乃擗踊抱城門柱大呼動地訴其魁曰人誰無夫婦汝等尚務殺人而來耶抑欲為安民計耶其魁義之禁其兵勿沮其往來王乃循河而慟夫屍忽自張香橋下水中躍出殮葬之益哀毀不食夫之神忽憑王大言曰我死汝無他志期五日當取汝與子女同歸及期王一慟而

絕子穎方十五歲女滿奴九歲皆同日死

周烈婦者太倉張百夫女贅夫周某淮兵下姑蘇時百夫謀刺元帥某事洩被殺并誅其家婦年十七有殊色械武陵橋上將斬之帥子誘之曰能從我活汝命婦怒曰豈有夫死父母死而我獨生乎又曰苟從我當葬汝夫及父母婦益怒帥子拔刀磨其頸曰不從斷汝首啖汝肉婦益憤罵顧謂所親曰我有金若干在某所幸為我買棺塋父母我則附夫側遂就殺梅氏吳縣人浦玉田妻淮兵破城浦逸去兵獲梅將汚之梅探懷中金與之乘間赴水水淺不溺兵至水

側以刀擬斫之梅不為動兵捨去後至者復欲鉤出之力挽不肯升兵怒以戈搥其腋死高啓為作傳邱端一吳人孀居守節淮兵入吳其父遇害欲污端一大罵不辱而死

某氏平江路史后載妻也淮兵破城載方行役京口妻巫屬子女于姻曰我夫在遠我不早死不幸被強辱雖欲死不得矣語未絕兵入急趨赴水死

擔夫婦不知姓名夫在官倉擔米至正丁未六月平江圍急倉夫應募充戰士死于城西婦號泣城下冒險覓尸得之既殮焚其骨裹以綿仰天大慟抱骨投

水死

張氏據吳時吳中妖異事見紀載者甚夥今集錄之至正乙未正月廿三日日入時平江城巾忽聞空中兵甲聲自東南來漸近民驚走覘視但見黑雲一簇中彷彿有人馬甲騎前後火光若燈燭者無算迤邐由西北方沒民居屋瓦揭去牀榻多倒仆或藏米醬諸物皆飛去其年二月張氏入平江

乙未七月三日嘉興東馬橋上白龍見盲風怪雨黑雲洶湧暗若深夜失府城所在萬屋齊飛溪水直立有大木從半空墜下折為二人皆叫號奔走經一二

時龍由馬橋歷城北望太湖去又是月六日松江見
一大星如杯椀尾長四五火光熒燭天戛然有聲又
東北飛入月中而止月如仰瓦星恰盛其中後不一
年松江嘉興皆遭兵亂

丙申春嘉興楓涇鎮有柳樹若牛鳴者三又海鹽州
有一栢樹作老鶴聲戛戛不絕頃之衆樹同聲和之
一二時方止是年兩地皆被苗軍抄燬

丁酉年三月上海人家雞伏七雛一雛作大雞狀鼓
翼長鳴明年戊戌春錢唐雞伏九雛一有三足又諸
暨雞伏五雛一有四足皆雞妖也

庚子二月六日浙西諸郡震霆掣電雪大如掌頃刻
積深尺餘是時杭州方被圍未幾兵退

壬寅八月上海民家已闢雄狗生小狗八其一嘴爪
紅如鮮血

甲辰四月華亭西清卷廊屋一十九間每間屋柱皆
有聲若以桶覆水面而擊其底者人以手按之則振
掉而起經時乃止是歲六月平江嘉興松江三郡水
忽平湧起高數尺若潮漲者雖不通潮處亦然蓋寔
非潮也

丙午八月辛酉上海俞店橋南牧羊兒三四人聞頭

上恰恰有聲仰視之流光中闕一魚是時方日昃縣
市人鬧然指一流星自南投北其明年丁未吳亡
元初有傳立者以下莖起東南世祖以杭州故都之
地恐有再興者命立占之對曰其地六七十後會
見城市生荆棘不如今多也後張氏據浙西杭數燬
于兵遂為莽墟

杭州自丙申春淮張陽平江後鹽米不通至七月有
運餉至者省臣喜為之挂紅越三日而淮兵入杭苗
軍赴援繼至城中兩遭劫掠廉夫紀事詩所云甌
子勢方吞鮪甕斬州血已到錢唐又云紫微老人迷

醉眼綵紅猶挂米鹽商是也

已亥十二月明兵突斬闕入杭州被圍城門閉三月
餘糧道不通城中手米直二十五緡米既盡糟糠與
米價等糠亦盡乃以油車家餅搗屑啖之然惟有背
力者得食貧者不得乃相率行乞雖婦女姿色艷麗
衣裳濟楚者不暇自愧也行乞不得至有合家結
袂把臂共沉者至庚子二月圍解餓死者十六七矣
吳淞米船始通民藉以活則又大半病疫死杭城劫
難如此論者以為平昔奢靡暴殄之報云
元發宋諸陵喪遺骼建白塔于杭故宫名曰鎮南以

厭勝之後白塔為雷所震至己亥士誠遣第士信守
杭壞白塔甃城塔遂亡時楊維禎作杵歌以馮役夫
之思中一首云杭州刺史新令好不用西山取石勞
拆得鳳山揚旆塔南城不日似雲高

淮張陷平江嘉興告援急達識丞相策無所出乃招
苗軍帥楊完者自寶慶來守之完者字彥英武岡
綏寧之赤水人性貪殘嗜殺所統苗獠谷刺罕等無
尺藉伍符無統屬相謂曰阿哥曰麻線其稱主將亦
然喜著斑爛衣草裙草袴以獸皮護項以帛束腰兩
端懸尻後若尾晴雨皆被覆毯狀絕類犬軍中無金

鼓雜鳴小錮若賣貨郎擔人所敲者夜遣士卒伏路
曰坐草軍中抄掠曰檢刮投黨者曰入火擄得男女
壯者曰土乘少者曰賴子皆驅為奴婢人艷者畜為
婦曰夫娘人多至十數婦一語不合即割以刃男女
老弱及色陋者皆殺之古稱好則人怒則獸信然而
完者復以貪殘之性將之不復可控制丙申二月入
松江焚掠火一月不絕城邑無噍類平江兵至乃遁
去夏敗平江兵於嘉興東門乘勢劫掠城以外窮目
力所至無寸草尺木秋援杭州擊退平江兵亦大肆
掠凡松嘉杭三郡並遭殘燬完者陽尊事丞相賢叔

制之奪其權丞相因畏惡之時張氏已降元欲圖去
完者丞相亦陰召張氏兵共圖之會士誠遣李伯昇
史文炳呂珍等帥兵復建德完者營于杭州北不為
備丞相遂以其衆襲圍之苗軍潰完者遣使致牲酒
於文炳為可憐之意曰願少須臾無死以底裡上路
報不可完者乘蹙力戰敗盡殺所有婦女自經死文
炳解衣裹屍瘞之祭哭盡哀完者部將宋興閉城自
守亦攻降之

丙申松江之變由王與敬與敬淮西安豐人以松江
府判陞元帥平江破與敬兵敗趨嘉興因與苗帥楊

完者不協投松江名曰守禦齊戀娼婦董睿兒也又
與鎮守元帥帖古列思不協與敬下萬戶戴列孫等
遂乘霧引兵焚劫鼓譟而叛官僚潰散寺觀民房悉
燬檢金銀財帛滿載出西門楊完者遣下帥蕭克員
成等率苗軍突至與敬遂北出通波塘投平江降于
女玉帛悉為苗軍有苗復大肆焚掠檢刮淫污居民
遂靡有孑遺月餘平江兵入松江苗乃潰去先是淮
張兵陷常熟松江府印造官號給吏兵佩帶以防姦
偽其製畫為圓圈繞以火燄圈內一府字以府印印
其上圈外四角府官花押時民間謠云滿城都是火

府官四散躲城裏無一人紅軍府上坐未幾城破悉
如謠言

平江承天寺初嘗遭燬僧悅楚南來住持大興土木
金碧殊勝有加于昔或勸題梁悅不從曰當有俗人
來暫居凡造諸寺觀必作儷語書梁間其餘則記住
持檀越主名謂之題梁惟承天寺獨否後淮張入吳
即據寺以為宮撤像設毀銅佛以鑄錢降元後別造
太尉府於子城乃復為寺又寺中有千佛閣木上皆
鑿萬歲閣三字先是因浙省災青有司籍所在木值
官酬以價寺中蓄大木將以建閣一黠僧因於木上

鑿萬歲閣三字有司遂不敢取及閣成其字故枉張
氏踞居竟以僧元鑿字名其閣蓋皆有先兆云

蘇州盤門外有太妃墳吳王士誠母曹氏塋處也今
人稱娘娘墳陸師道弔太妃詩云盤門門南荒草原
云是張王之母太妃墳王師剪偽詔勿毀發邱曾禁
徐將軍南山不足銅石柳寶氣近化陶家氛當時割
據誠草州送死豈惜生民勤珠襦玉匣極僭侈至今
銀海元宮分我開寶騎士如雲不知誰作哀冊文傾
碑斷表已灰滅惟有樵童牧豎躑躅欹斜曛嗚呼墳
邊不起萬家邑一杯麥飯何足云二百年來苟完骨

饑魂猶勝齊雲焚

原本稱太妃墳隣吳門橋高大特異聞當明兵至張王與達書乞退軍三十里以俟葬葬畢會戰一夕橋成蓋吳民用命也考明祖遣徐達等伐吳時已成以勿侵毀士誠毋墓豈俟兵至平江方葬耶其說未可信

平江破時士誠妻劉氏率姬妾登齊雲樓自焚死席帽山人為作劉夫人辭云劉夫人至正太尉吳王嬪笄珈車服置弗御澹烟常鎖雙眉春中州援遠敵在日叔貴日驕疆日感背城借一王本心狐狸狐搢將

軍欲夫人勇決烈女義百口樓居親舉燧片時陰慘萬世生月明風清珮音至君不見男兒成敗古有之孰以楚霸輕虞姬蘇民安得夫人祠烏棲白鳧庶少襄時吳將士宿僚竟無一人死難者天台王澤弔以詩云天星夜落水犀軍又見吳臺走鹿羣睥睨金湯空自固倉皇珠玉竟俱焚將軍只合田橫死國士寧無豫讓存風雨年年寒食節盃盂誰上太妃墳又有人賦絕句云虎鬪龍爭既不能鷄鳴狗盜亦何曾陳平韓信俱歸漢只欠彭城老范增

金姬者李氏名金兒章邱人李素女也精于卜士誠

起兵時素舉家被俘金兒未及笄侍太妃曹氏帳中
高郵被圍旦暮且下金兒卜之謂當固守敵且退既
而圍果解號仙姑其父母家受賞士誠將遣兵渡江
姬卜之吉果定平江及議移都平江姬獨言江南不
可居居且不測隱語托詩以諷士誠不聽臨行召姬
同行問以曆數對曰入吳之後當更為國家深思耳
姬見士誠日驕奢每為高論以勸之又不敢犯士誠
稱吳王冊為金姬曰事成當進為妃姬知不免乃辭
太妃出拜天須臾氣絕士誠葬之福山港口悉以珠
玉殉一日士誠妻劉夢姬泣曰國家舉事大錯難為

計矣他日又夢撫士誠二子曰有不測當陰祐之及
明兵攻平江士誠屢敗思姬言加封仙妃祠而卜之
今常熟西北有金姬墩俗訛為金雞

平江圍急士誠度事已去密以小兒置街上有顧姓
者收抱之身畔有金二錠其衣則龍鳳文也人始知
為士誠子此子每飢必須倚桌方食若席地與之不
食蓋習宮中故事也及長冒顧姓長身無他奇宣德
間尚在有子都太僕穆尚識之在吳中為塾師云又
平江將破時士誠妻劉夫人以二子付金姬之母及
二乳母匿民舍兵事稍定母潛行出城至姬葬所塚

先為亂兵所發屍已斃去惟衣衿存焉掘其旁則珠玉尚在乃盡收之携二子還章邱買珠玉以市產二子長冒李姓洪武末其季領鄉薦赴都下母囑之曰都中某所有盲母殆八十餘可哀訪之倘在可寄語吾尚無恙速報吾季如其言訪得之盲母聞聲捫其面披二掌曰何物小子聲殺似吾弟也國亡幸留此孽敢不畏死來此耶即推出拒其戶蓋盲母乃士誠姊得赦不死當時與聞托孤者也明日李遂稱疾亟歸子孫世編章邱藉

按史稱士誠有一幼子匿民間不知所終今考都太僕日記稱士誠子在吳中冒顏姓原本又稱有二子在章邱冒李姓然則士誠殆有三子矣並紀之以廣傳聞

元時無邊警軍需甚富張吳因之錢糧科取皆仍元舊小有水旱即議蠲賑又時溝修水利縣設為官故群雄僭竊所在多飢乏而三吳浙西獨稱殷富洪武三年太祖御左順門問戶部天下民生孰厚產孰優對曰江浙富戶最多

張吳出兵有降附者即命將仍其職兵仍其戶缺者召募補之如民間自結義社隨給以稟待調名曰民

義

張吳既稱號改元思忠厚立國而失之縱罪人初犯
記過大辟或有自赦者即大將喪師失地亦置不問
驕恣成習以至于亡

淮張寇江南日于臨陣之際齊聲大喊阿瘡瘡以助
軍威

元宗室神保大王在吳戊戌冬淮藩有朱將軍者晏
之于私第時夜雪衆賓執盞起為壽神保大王命左
右彈白翎雀此元世祖命伶官石德問所製曲也末
有孤嫠悲怨之音神保因述製曲之始令坐客咏之

王逢為之作長歌後吳亡神保大王入金陵明祖送
之還元

呂左丞珍守紹興日參軍陳庶子饒介之在平江一
日陳賦詩饒染翰題一紉扇以寄呂云後來江左英
賢傳又是淮西保相家聞說錦袍酣戰罷不驚越女
採荷花詞翰雙絕呂得詩令人讀之忽大怒曰吾為
主人守邊疆萬死鋒鏑間豈務愛一女子而不驚之
耶見則必殺之又有李元帥者杭州庚子之圍李力
禦得解一士人過見投以詩有黃金合鑄李將軍之
句李大怒曰吾勞苦數年止是將軍今年纔得元帥

乃復令我為將軍耶命帳下扶出之二事陶九成並紀之題曰武官可笑

上海有俞俊者性輕薄恃才傲物張吳據平江俞以賄通松江尹鄭煥署宰華亭用酷刑脫剥邑人恨之郡士袁海叟作詩曰四海清寧未有期諸公衮衮正當時忽然一日天兵到打破王婆醋鉢兒或不晚醋鉢之義以問袁袁曰昔有不軌伏誅暴尸于竿王婆買醋過其下適索朽尸墜醋鉢為所壓碎王婆年老無知顧語尸曰汝只是未曾吃惡官司來聞者皆絕倒

至正丙申淮藩將史文炳累攻嘉興不克或撰戲語云史師一日下令行兵參謀掌史進言自古行兵必先祭旗史曰王元帥破松江時曾祭否荅曰不祭史曰王元帥不祭我也不祭蓋祭濟字同音博以為笑又云紅軍與苗軍戰不勝稟主帥曰彼中軍前有十丈大旗旗上篆字大元統兵官五字帥曰我亦效之旂成軍吏稟所寫五字帥曰八分書馮趙王今既而馮趙字未成才馮得走字傳報苗軍到走走走二說皆可捧腹

姑蘇楞伽山下有李司徒行素墓行素即司徒伯昇

之父從張吳至平江以陰陽術人為丞相吳亡入金陵後蓋歸葬于此又薦福山修竹塢有吳平章朱英墓

隆平紀事下卷終

隆平紀事

史冊字義維鑑六世孫少補弟子員家貧力學孝友夙成嘗慮宗族散佚折衷歐蘇為族譜又請祀九世祖仲彬于禾郡鄉賢後躋于試遂棄舉子業殫力於古文辭雄深博辨無有出其右者熊公開元令吳江特重之屬以史輯縣志未成而卒年六十五子宗勤亦有文名

英江縣志
隱逸傳